

四庫全書

集部

欽定四庫全書

日涉園集卷五

宋 李彭 撰

七言古詩

聽侍其雲叟琴

君家建鄴城東頭捲簾卧對長淮流  
除書謗書不到耳空洞腹中無片愁  
白浪從高瓦棺閣清夜無人響猿鶴  
琴聲時復一挑之北斗橫天月將落  
御風過我故山岑一寫太古之清音  
當春風動為淒緊波底時聞龍一吟

坐觀人琴成二妙覺來形穢顏枯槁伯牙袖手意有餘  
請公臨流一舒嘯

聽程道士琴

鷗絃鐵撥世多有玉箏銀甲嗟凡陋平生綠綺醒心泉  
淨洗耳根端不朽鍊師霜髭已滿頤履霜坐彈霜葉飛  
腐儒凍餒非所惜物物願荷皇天慈

演上人以權詩示余歸其卷演師系以長句

花縣潘郎未白頭下從玉局仙翁遊平生四海饒次守

脫冠壞衲藏深幽死生俱在天一角句法不復陰梁州  
眼明得此道人演更遣權詩遮世眼喚起蘄春十年夢  
恍如神明還舊觀黑柏蒼鷹飽欲飛天馬銜芻方來漢  
演翁自是塵外客筆端秀句應無敵禪餘軋軋弄鳴機  
紫鳳天吳亂紅碧會當載月漾舟來盡出公家金粟尺  
觀呂居仁詩

西風塵暑功夫深老火由來欺稚金蠻花缺月午夢短  
伐翳正爾開遙岑忽看僧珍五字句妙想寔與神明聚

清如明月東澗泉壯如玄豹南山霧抑揚頓挫百態隨  
驚鳥欲舉風迫之莫言持此黃初詩直恐竟亦不能奇  
老懷凜凜受霜氣想見此郎冰雪姿鄙夫好詩如好色  
嫣然一笑可傾國擊節歌之侑歡伯杯中安得著此客  
此客不肯絀塵羈况復世網如蛛絲秋空橫河鵬鶚上  
不許蜂蝶同所歸漢家太尉死宗社大鳥泣墳天所借  
謝傳未吐活國謀賈恨懷奇赴泉下僧珍向來期此人  
頽波砥柱妙入神要當疊些湘水濱喚起猶足張吾軍

曉發琳山晚會於湖光亭

琳山寺前雨翻盆  
辟邪渡頭爭渡喧  
湖光主人敬愛客  
解裝咄嗟開酒樽  
江城花盡柳亦老  
薄暮歡娛憐草草  
殷勤為喚兩紅顏  
始知人好鳥還好  
斑斑鬢間少黑絲  
客中不復憂心擣  
阻酒中聖少年時  
江湖放浪真忘歸  
老來頗喪丈夫勇  
心隨暝鳥投林飛

謝人見過

門無襜褕軒車過  
草廬寂寂南陽卧  
夫君掀髯來扣關

不減昔日陳驚座肉食者鄙無遠謀喜君義氣橫霜秋  
已看獻策尊王室白筆應須上黑頭

遭風禱神林浦

伐鼓放船落星渚爭曙鳬鴻集儔侶乾旋坤轉風掀掀  
陽侯就戮波臣怒廬山孤嶽政排空複閣重樓欲無路  
水蟲瑣細何足云竊發憑陵敢予侮長年吞聲三老悲  
老妻驚呼稚子啼病軀不能自料理袖手懸知蓬粉期  
謝公吟嘯吾豈敢興公悲號差勝之寒菹百甕未渠盡

猶得餘生見昏覲歸帆行將拂五老要及霜風快雁隼  
徑須作牋寄魴鱖行路艱難公莫遽

南至日離同安舟中寄阿弓

去年關冬亦戒塗北風吹雪邾城隅八字山頭駕高浪  
曙角更聽吹單于今年南至又行役蕭寺佛香僧飲俱  
身在瀟湘黃蔑舫眼看惠崇歸雁圖紉懷吾家之季子  
細酌明窓愁欲無詩腸定遭酒媒孽語作曉霜催槁梧  
漫將長句代作草河凍難求雙鯉魚歸期不落蜡賓後



行李困來頻寄書

夜宿寶巖寄寇李二鍊師兼懷王環中

北風驅雲度危嶠日下蒼茫煙靄橫山靈喚客起杖屨  
定自不凡為此行山南冥搜未得妙山陰問津向猿鳥  
遙岑疊疊羅峻屏溪流濺濺鳴楚調眼明全椒道士家  
丹砂入頰瞰朝霞談間勃窣妙理窟挽不聽去猶欲遮  
縹思右轄千丈松眉宇中藏嵇阮風放船雲夢鬼作崇  
魄磊仆卧洪濤中此翁身大不及胆引帆復逐天邊鴻

淵宗堂中柱史喬黃鵠作雛敗鶴唳衣裾不著京洛塵  
潛心涪翁哦五字相逢俄頃復解攜韻勝遣人增想似  
僧牕夢短夜復長句挾寒霜聊可寄

寄崇書記

窮山歲晚滿煙雨欣逢支公會心侶  
斷詩已度曹劉前  
談玄復恃殷函固寒廳夜寂斗正橫  
哀懷徑協滄洲趣  
新章頓挫兵出奇遙隨歸雁下煙渚  
胷中書傳要扶疎  
筆端聯翩將脫兔淵淵搗就漁陽搥  
遽作回帆聽鳴鼓

明牕試翫老髯語黃鶻看君響長阜山陰傲吏有僧珍  
水鏡湛然當見許

寄甘露減

道人欲居甘露減年來寄食溫柔鄉開單展鉢底事遠  
舉案齊眉風味長我哀日涉甘岑寂頗遭霜刺頤長出  
願隨魚鼓供伊蒲一墮塵網誰能力要知在欲是行禪  
久聚荷花顏色鮮秋濤風怒何掀掀莫倒危檣沈法船

寄何生

爛羊都尉本不惡鬪雞開府無處著天祿諸君盡貴游  
據鞍上馬能不落何郎未免儒生酸於此政復不作難  
但公刺著潛夫論何須頭上鵝鵲冠

懷秦處度復用山谷韻

秦髯昨首長沙路捨舟來甘餘霜兔翻憶淮山鷄黍秋  
二十年來穿幾屨衣如懸鶉氣栩栩足垢頭脂藏妙處  
欲買桑柘間里歡却乘舴艋江湖去似尋劍客脫塵埃  
北走南遊未安堵去年籬菊今又黃安得同嘗嗅香霧

遊雲居歌

岷峨秀氣凌太白諸峰彈壓流輩百右軍昔為懷祖困  
此心勇往曾未識羊家叔子端可人峴山何為苦傷神  
多情賴有鄒從事與山不磨有遺味平生尋幽幾履穿  
始知歐峰峰外天捫參歷井出鳥道耳邊河漢聲潺潺  
千古追懷同一律神明還觀悲節物兩郎凜凜安能來  
定於何處埋爾骨往時弘覺大道場心淨無塵聞妙香  
幽禪寂寂師祭可高韻卓卓凌羲黃九原蕪沒那能作

勝日良游自不惡靈雲野桃初著花鼻祖柏子僧前落  
玉函貝葉渡流沙法筵復雨曼殊花充虛解戰天皇餅  
破魔驚睡趙州茶世網嬰人太煩促桑下安眠戒三宿  
柴扉草閣空歸來大梁推枕黃粱熟

玉花驄

杜陵絕唱驄馬行想見躡雲噴玉聲龍眠貌出姿態橫  
香羅覆背紅汗透如行沙苑秋風瘦我羹芋魁乃飯豆  
不愛金羈如此驄深雲一塢住山翁朝霞入頰常暎紅

胡少汲名直孺龍舒佳士清修可喜往歲見之

金陵聞除侍御史因作此詩以見意

聞君往年客淮西及見我公無恙時潛山皖水德星聚  
天下中庸人表儀川行節往萬事盡我獨流寓東南涯  
協洽之歲秋九月買船適詣秦淮湄建康城頭鷄欲曙  
白下門前烏未飛有客剝啄復剝啄戛然野鶴下孤嶼  
意定吾子初無疑高談確訕不跛踣養此鬱鬱澗底姿  
發蒙振落笑餘子招之不來不可麾判司卑官果難屈

脫身遂與箠楚辭行行且止避驄馬膽落於地非公誰  
御爐煙動天顏喜柱下雲開春日遲側席愛民如愛子  
願達民病蘇瘡痕要使英風觸白獸更遣直氣生青規  
鄙夫養疾江漢間有如不信吾誰欺

范家所藏孫知微畫彭祖女禮北斗圖

晴空無塵月在房松間博山沈水香翠眉女子約畧粧  
兩足亭亭如雪霜步虛之聲風度長紫微北斗忽低昂  
金釵何勞十二行不羨盧家丹桂梁凌雲已復飛羅裳



生絹寫照公家藏應憐彩鸞翳鳳凰未能割愛俱翱翔  
戲答樓笋

髯翁落落綠坡竹肥如瓠壺書滿腹好客勤炊燭代薪  
中厨羹金仍膾玉春風渺渺生微瀾欲向吳江把釣竿  
引帆伐鼓閱三歲候雁不來衣帶寬阿蠻虎子能哮吼  
千金掃除似無帚却甘杞菊侵我畦固窮不障談天口  
刺誇樓笋饒生津章就旁搜不厭頻錦綳嬌兒直欲避  
紫駝危峰何足陳出為小草居遠志藜藿盤中長此味

客來不廢董嬌嬈安用凋胡見真意年來我亦食無魚  
莫遣此老專懷瑜時時酒澆茶莽尊亂我玄藁俱扶疎

送所借書還王生

鄴侯家藏三萬軸牙籤新若手未觸此翁眼如九秋鷹  
一過成誦不再讀愧非玄晏獨崢嶸復愧王郎著論衡  
案頭螢乾太苦相久假不歸何癡生開州公子好竒古  
胷中寶笈森四庫安用鄴侯挿架書向來借我紙上語  
頻年多病百不如準擬傳書學截蒲還君一鷗細故爾

莫厭時時開鎖魚

題閻立本醉客圖

酒有何好工作病頗怪斯人喜中聖藏身麴蘖勝巖幽  
寄愁天上呼不醒春風吹開玉東西月落參橫斟酌之  
吐茵脫帽有妙理眩朱成碧渾忘歸右相丹青果馳譽  
幻藥調成疑笑語便覺微綃古意生似聞醉眠卿可去  
半生憂患復蕭條甕中肥遁何須邀一樽桑落對公等  
盡解平時藜藿朝

包虎行

畫師老包氣如虹解衣醉倒塵泥中急呼生綃卧展轉  
筆追造化分奇功須臾奮袂於菟出絕壑陰崖嘯風月  
懸著高堂煙霧深觀者膽寒俱辟易誰為彪子與彪孫  
宛陵後葉諸仍昆顧視雄姿亦道緊小犢鰲栗何勞吞  
通玄論成馱貝葉大空小穴隨老衲何暇與汝同條生  
玄豹豐狐要彈壓

望呂道士庵居不果往

鍊師精悍極了了穹谷營巢若飛鳥流泉滌盡化溜塵  
明牕點存填血腦停策微聞叔夜琴叩闕阻食安期棗  
我方尋源上河漢目送落日諸峰小杪秋蠟屐要重來  
與子相過拾瑤草

食鰻魚戲呈夏侯

君不見吳良齋郡吏斂板居高隨掾史諸郎元日壽府  
君觴酒諛言敗人意口角擊節五馬賢鰻魚百輩為君  
賜又不見江左之褚淵此魚一尾售數千丈夫須髮果

如戟但知堪炙寧論錢平生剛直卧江漢非吳非褚何  
由羨療饑漸臺亦可悲味比瘡痂良可賤謂言此物不  
擬嘗餉我因君累十觴漢陰槎頭推不御徐州禿尾甘  
走藏藜莧觴中初未識已覺盤飧慘無色憑君遣使更  
函封莫令子羽吟頭責

重遊草堂

德人昔遊居寢處一草一木可敬之涪翁初釋隸道縛  
枉道過我臨水湄梵宮三託吉祥卧悠悠東泛長淮涯

牽絲姑孰席未暖鬼瞰高明俄解龜鸚鵡洲前弄晴泚  
祠宮寄食長江西黃絹碑中發奇禍播遷瘴海如湘纍  
天生斯人意有在世或不用將何疑巫陽下招化黃鵠  
不遣啄腐隨家鷄前年歲晏到蕭寺開眼適見鄒松滋  
涪翁故時得此客今已改色嗟流離大招淚濕綠坡竹  
神觀凜凜疑來歸今年森木挂秋暑鷓鴣鈎輒向我啼  
重來野僧零落盡壞帳鼠啮非當時過眉拄杖為小立  
將暝西山舍夕霏

黃岡尉錢紳種蓮其上開軒榜曰超靈蓋取鮑  
參軍荷花賦超四照之靈本云

平吳利在獲二陸我得斯人一獲足明光射策卷波瀾  
灞橋新詩挾冰玉只因心賞鮑參軍種花欲招千載魂  
筆端有口不倚辨

一作待辨

盡付此花生氣存一代風流幾

頓盡漢官威儀聊復正覓句何勞夢惠蓮解頤未用呼  
匡鼎秋風蘋末助颼颼花藥應須讓一頭何必嘉陵種  
嘉橘始擬人間千戶侯



東庵舒老出徐兔圖障求詩章末兼戲行叟

宛陵包虎天下無徐生之兔畫作殊眼明忽見此桀者在笥不獨藏於菟平岡雄兔脚撲朔草樹深煙紛漠漠懸知丹青相拂斫不怕蒼鷹頭戴角坡陀雌兔眼迷離拊憐大兒攜小兒銜粟分甘且療饑學母由來無不為東庵道人念俱寂遣予不復嘲熟客生綃新圖聊一出便覺野風來四壁紈懷中有衣褐徒不牙不角真跌居莫令舉網拔豪族湯沐管城還自娛黑頭歸來能自了

巖壑猶堪伴猿鳥

題伯時所畫邵平種瓜圖

邵平湯沐故千戶解組投林如脫兔勒銘鼎鼐屬伊人  
我方荷鋤斲烟雨瓜田鉤帶蓋阡陌大者輪囷細旁午  
穀函設險吾何補日日青門自成趣槿籬半破復牽蘿  
夕霏晚晚留疎樹娟然翠氣出眉嫵喜得斯人慰遲暮  
劇談欲寫塊磊胸尚恐軒昂作莊語畫師紛紛安足數  
對此令人重豪素陽陵公子傲雪林灑落由來足風露

自言購取傾家貲柴桑要伴歸來賦兩郎後先千載餘  
粉墨相追叶風度懸之素壁足丘壑噉噉猿啼起寒霧

題盧鴻草堂圖

丈室幽雲織翠微盧生草堂雲作扉陰崖絕壑鳥跡稀  
扶藜縱觀拂雲霓心知丹轂赤吾族要須愛身如愛玉  
三十六峰幽意足何必鑒湖分一曲老仙曾上登封壇  
一夜靈生雙足間不知此圖筆筆妙巖巒映帶冰霜顏  
集賢學士從省歸僧床卧觀畫掩扉繡鞍那補塵化緇

不如盧郎駕鴻飛老色蒼顏今採薇故山風煙常滿衣  
眼明見此社中客盡謝東阡與西陌

題包虎枕屏

兩虎肉醉欲醒時飢腸得飽恣遊嬉一虎當巖自哮吼  
朝欲食子暮食妃最後一虎絕長者坐歎眼有百步威  
豺狼當道正須汝莫尋免徑問狐狸

列遵道以古銅爵見歸

何年銅爵姿狀古如對高人開美度重雲結疊虺虺雷

遠腹循環危欲雨廉問御風之子孫世南秘書藏肺腑  
縱鉞欲炙真垂涎舉以壽卿吾所許非無玉卮金叵羅  
簡素睨之如糞土奈何趙璧復來歸知我懷茲會心侶  
拂塵識面如故人口不能言實莊語細酌明牕舊索郎  
伴我微吟度寒暑

吳熙老家風雲圖

秦人屈鼎真畫師胸蟠風雲人得知獨無佳句自潤色  
未忍援毫時吐之酒澆塊磊遂倒橐素練忽復翻淋漓

宛如盛怒生囊口。颺至霆擊何由追。墨雲憲霽摧半岳。  
飛動殆莫窮端倪。征人解裝馬伏櫪。居人墜戶雞亦棲。  
虛堂高掛髮為立。三伏凜凜無炎曦。吳侯憐我慘不樂。  
卷去隨手俱清夷。乃知非獨畫工妙。妄念起滅分毫釐。  
想當在笥常洶洶。不與關河相蔽虧。會當一雨被八表。  
何用祕藏深密為。

題伯時畫蓮社圖


遠公得名喧宇宙。如意舉墮渠不知。何為陂聚野狐羣。

依經解義真成癡柴桑老翁挽不留籃輿醉衝烟靄歸  
由來却具一隻眼社中不著謝客兒白業許時露消息  
鼻觀參取初自誰飲光微笑總為此至今留與後人疑

題吳成伯家文與可所畫晚靄橫春圖

湖州手參造化鑪墨君老稚俱扶疎含毫回作晚靄戲  
憑軒丹青渾欲無雨聲忽破鳥行急木末尚掛窮猿呼  
衰翁將離來蕩漿挽引斜暉到漁網嵐昏那計目力長  
厓傾欲陟天梯往湖州雖仆妙相存此畫他年人更珍

但恐君家風雨夜山川斷取不無神







欽定四庫全書

集部

日涉園集卷八

六至

詳校官庶吉士臣陳若霖

侍讀臣孫球覆勘

謄錄監生臣劉錫珪

謄錄監生臣黃維

欽定四庫全書

日涉園集卷六

宋 李彭 撰

七言古詩

晨起

晨起按行瓜芋區園豎畦丁  
爭殿最蹲鴟壠底未輪囷  
蒲鵠藤間懸釣帶錦里先生  
態度同青門故侯風味在  
肥家敢望李衡奴擊彊安用  
任棠薤累人僅解口腹嘲  
賁酒可免尋常債含毫初不  
為矜奇遣興聊須風雨快

韓熙載宴客圖

卷六

紫微華屋桂為梁中有侍兒宮樣粧  
閉門投轄醉短舞牛馬因風兩相忘  
翠翹掛冠真細事必能作賊無顧忌  
堂上燭滅何足云亦期羽林射鵬子  
當年誰遣轉鴻鈞終典哀榮厚恩禮  
西風猶吹建業水直恐姦魂污清泚  
次山谷答范信中韻

范君膽勇如季路三穴笑談空狡兔  
銳頭初無儒生酸果呼下邳換雙履  
往年風義公獨許藥裏追攀險艱處

公隨瘴葉落瘴鄉買舟反骨勞君去少陵未築耒陽墳  
尚喜宗文有環堵人生萬事何所無極目澄江鎖寒霧  
賦張邈所畫山水圖

異時頗愛宋元君踏門畫史如雲屯  
舐筆和墨太早計解衣槃薄全天真  
夢澤張侯飽閒暇直疑胃中有成畫  
酒酣耳熱呼不醒澹墨淋漓疾揮灑  
誰為右轄賦招魂遠過酸寒鄭廣文  
怪底高堂見丘壑欲攀松蘿尋石門  
咫尺終南與王屋翩翩不下如黃鵠  
水南水北索價高

放浪猶歌紫芝曲張侯愛畫入骨髓腦脂遮眼良有以  
筆端刻意寫遺民要似留侯赤松子如聞可汲用王明  
會須添作貢公喜

賦米芾所畫金山圖

憶昔扁舟帆正落楊子江頭風浪惡江心樓臺渾欲沈  
不獨能高瓦棺閣晚山接天波面平白鷗去邊鐘磬鳴  
雲昏上頭不可到往來余懷今未寧楚狂澹墨掃絹素  
澄神卧遊知處所欲披霧牖尋野僧反向烟汀辨江樹

新詩葱蒨工於畫川岑想像高堂掛驂騑絕塵走千里  
何勞遠處幽并夜漸到潯陽不復前安得仙山來眼邊  
斷非毗耶掌中取直疑壺公謫處天新詩妙畫真有益  
張衡南都能畢力不如此詩氣齒萃却使丹青句中識

小憩琵琶亭呈環中養正

香山居士骨已冷文采風流今未遙捍撥何勞作胡語  
寒江壁月想前朝濤波竟夕相喧飀吳檣楚柁爭傾歌  
老夫何暇知許事但飲松醪魚蛤蜊

客有以戲魚竹枕見餉作此謝之

蘄州笛竹含風漪縹瓷斲月聊相依白頭苦風癡女問  
歲晚乃知非所宜公從何處得此枕勁節儲霜餘凜凜  
游戲真同赴壑魚小牕夕陽助酣寢餌甘釣深安可圖  
長網橫江嗟已疎我寧低昂弄清泚絕勝縷切太官厨  
莫作枯魚過河泣寄聲魴鱖慎出入長伴幽人蓑笠眠  
夢破寒沙風雨急

同子蒼放船南山石壁下



南山修源何所似，顧癡鋪張側。釐紙酒酣漱墨，風雨來

咫尺煙昏。

一作雲

生萬里。韓侯靜者，妙英姿，乃呼扁舟共

遨戲。我曹竟墮善幻中，叩舷歌呼，但霑醉寺下，回潭凝  
不流。中有卧石如潛虬，孤峰已銜半規日。連山倒垂波  
底浮。韓侯風雅才甚優，胷中何止吞萬牛。未向承明草  
蓮燭，小留南國馴沙鷗。會須喚仗入天陸，尚憶谿邊橫  
小舟。但願故人俱厚祿，平子不妨吟四愁。

何生復用塗字韻，喜予從東坡游，作三篇見寄。

次韻答之後篇東劉壯輿

嶠南將成金匱書喜又賜環香拂塗萬釘圍腰乃為崇  
慣作臞仙多槁枯元符相國泣前魚長流百粵復羌胡  
周漢二宣果明哲金玉王度復關渠

東坡十年作謗書多情杖屨作歸塗雪堂公去頗削迹  
來禽青李皆已枯秋風醉索武昌魚脚敲兩舷聲函胡  
只今諸生典刑在他日明公游石渠

冰玉堂前十國書君能讀之行坦塗一洗談天千古舌

呂梁大壑何時枯願君不用校魯魚亦須調笑酒家胡  
玉局仙翁無浪語大禹以來未有渠

喜二何從山谷遊復用塗字韻詩

水部諸郎蔓尾書涪翁杖履傲當塗斑斑束笋門下士  
梳貌蠟言嘖笑枯翰墨瀾翻縱壑魚風采灑落鳳棲梧  
寄語南州雙白壁從今價重百車渠

張僧繇畫胡僧看經

蒼崖倚天暝色起風微擱葉藏孫子老僧龐眉雪覆觀

梵音清遠發皓齒向來萬法出此經行行春蚓紆黃紙  
覲面相呈事儼然歸雲欲渡前溪水

題夏氏萬賞亭

公家文莊佐縣官萬國朝宗天不言桂梁蘭室治私第  
鳩鵲建章爭絕倫昭華穠李態度新綠尊翠杓羅縠紛  
人歸夜臺金狄泣一種風流今尚存小君家聲自陰后  
五侯四貴印如斗渠渠夏屋幾百椽誰能近前畏左右  
去天尺五付此郎詩豪酒聖復專場錦韞花驄折楊柳

霸陵惡少艾如張危亭複閣來南州佳客爭門陪俊游  
朱轡皂蓋駐五馬巨羅醉擲高陽侯青蛾皓齒動星眸  
尊前舞罷錦纏頭參橫月落了不問四并在手吾何憂  
腐儒蕭然愧環堵藜覓胸中虞庠句頽然被酒燭如虹  
戲效吳歌歌白紵

戲答賦蚊

江湖白鳥傳自古螫螫孫曾亦如許聚雷豈解殷晴空  
媒孽耳根良自苦野人睡美不聞鐘草木萃萳森蟠臂

啞膚攻喙漫不省躍躍自喜安足雄若人才高樂譏評  
滑稽能發古人興勾引西風塵細蟲小醜何勞霍去病  
遊東園戲作長句

久客殊方無永味排遣春愁逐遨戲曉濟吳榜訪東園  
欣欣草木多佳氣縹瓷竹葉沃春心黑面酪奴驅晝睡  
親黨諸郎意氣豪挽強對爽真能事鄙夫魯鈍獨長吟  
一聲望帝動歸思

贈吳雲叟

宛城居士如冰雪大藥親逢悟禪悅丹霞正印君得提  
洞下靈源渠未絕淨名杜口涉言詮口如布穀意莫傳  
心猿睡起六牕淨為君作戲彈無弦

贈張聖達

人言汝穎多奇士秀潤如君飽風味兩韃馳射不作難  
三峽倒流聊復爾平生未識嵩少雲三十六峰巖壑春  
因君便覺來眼界翻作新詩持餉君

張子和子文以長句送朋壺次韻答之

下自成蹊藝桃李此語聊持餉吾子南風吹句落牕几  
蕭然出塵天下士詩壇挑戰生一秦窮賸水部好仍昆  
氣無萬里照夜白伏櫪麒麟收驚魂荊州但獲一人半  
二雋風流眼中見機雲空誇千里尊如公筆端那復倦  
我誦懷沙自療饑時時間出危苦詞鳴蛙兩部頗娛聽  
鉅竹千竿端相持督郵雖賤不勤置儼然真辨絕交事  
知君風味似建康連璧頓來隨俗吏漫澆平時過秦胸  
經醉咄咄成書空兒曹為具明蠶紙欲賦雌蜺吞晴虹



懸知在德不在酒耳熱清狂須酒後客來舉觴不得言  
古本因之忘可否擊柝相聞非路長濤波隔津成兩鄉  
待我營巢浣花了過君更僕對繩床

用擬古韻答瑛上人

劇飲徑須尊有癭搜攬新詩轉道緊誰知雲牕除饑男  
燕坐微吟兼粲忍吾哀霧霧滿胸中玩味甘腴真雋永  
含毫覓句剝欲酬時有寒泉汲舊井

先成都訪故園得顏家斷壠碑

我生性僻喜客卿有練先書無復羸墨池筆冢聊爾耳  
春蛇秋蚓勞譏評正書不數黃庭經况復焦巖瘞鶴銘  
永和題尾束高閣醬瓿往往多蘭亭怒猊渴驥日遠屏  
嚴家餓隸當吞聲千金敝帚不自見憎雞愛鶩何瘕生  
我家成都萬人傑向來古心冶金鐵顏公斷石出糞壤  
一落眼界清思發政如令嚴亞夫軍中天夜寂懸明月  
速須乞靈向若人運斤成風萬鈞力筆端寫我剛直胸  
復與顏公振遺烈

宴清心閣

馬尾垂楊已墮綿春風暴謔惱中年驅車作意訪花縣  
地主風流仍更賢倦遊不比長卿慢自迎傑閣開清宴  
高談雄辨俯飛鳥急管哀絃徹河漢君侯筆端妙入神  
百斛炳煥扛龍文承明合受鸞花繞何事斂板趨埃塵  
清朝好士如好色况茲卓絕流輩百追鋒看即朝日邊  
莫道垂綸在幽旻

阻風雨封家市

往時李成寫驟雨萬里古色毫端聚行人深藏鳥不度  
便覺非復鵝溪素龍眠老腕作陽關北風低草雲埋山  
行人客子兩愁絕未信蒲萄能解顏兩郎了了解人意  
似是畫我封家市戲作新詩排畫睡忽有野雁鳴天際

贈中上座

梁可仍孫本吳產萬遍蓮花亦遮眼時時幻作文於菟  
寂寥恨得斯人晚我如叔夜七不堪倦書羞學蠹書蟬  
已約東湖徐孺子招公山北復山南

贈宗紱上座

蒲萄不飲熊耳杯  
薰爐甘作橐駝生  
胸中皎鏡湛靈源  
結習已空花自墮  
眼明見此除饑男  
妙語時時零玉唾  
稻畦摩衲丈夫事  
吾獨知之胡不果  
鉤章棘句竟何裨  
徒遣詩人嘲飯顆

觀法華牛鬪戲呈戒上座

雞棲于埭晚山碧  
兩牛偃蹇萬鈞力  
黃鐘滿脰鳴相歡  
歟起緣何作勍敵  
水牯敗績秋風前  
穿林敲鯨蹊人田

幾無將軍破燕虜適堪衛尉駕車轅碧眼山僧可人意  
大牛小牛與穿鼻更須宴坐三十年直待無鞭更無轡

雪夜書懷

夜烹伏雌歌偏側泰山其頽吾道阨天邊奎壁霞蘇公  
諸君往往瀕蠻貊帝遣仙儒玉局翁涕下悲吟夜蕭索  
冰姿玉立似平生化作人間截肪白黃屋久悟金縢書  
豫行溫詔歸遷客嶠南華髮老先生解羈來卜愚溪宅  
枉遭越犬吠蒼皇莫吟冰柱要呵責重瞳雖復達四聰

尚恐乘軒多令色短檠花重寒不眠南望猶嗟萬山隔

蝴蝶詩序

楊昊明之世家蘇州少孤力學娶同郡江氏  
婦翁官江州征市明之盡室與俱來予於江  
君既親且舊以故過江君始與明之相識後  
一年明之挾冊遊上國抵許州客食親館一  
夕暴卒卒之明日有蝴蝶大如掌許裴回翔  
舞於江氏旁竟日乃去始聞訃聚族相與哭

蝴蝶復來遠江氏起居飲食不置也夫明之  
不得其死未能割愛於少妻推子故化蝶以  
歸耳世之罕聞異事人之英偉不凡死有遺  
恨精爽不沒沒能化物出遊人間以自表見  
亦可為流涕者矣予與明之善故作此詩以  
悼之云

碧梧翠竹名家兒今作栩栩蝴蝶飛山川阻深網羅密  
君從何處能來歸疑君枕肱作莊夢誤隨秋風訪天涯



大兒稍黠兒中虎小兒初學繡帳語青娥皓齒越中女  
夜挑錦字停機杼可歎不可思可思不可見君來翻作  
昧平生看朱成碧非君面耿蘭作報斷人腸况復雀聲  
哦洞房不知真是玉人否大鈞刻彫不可量君不聞蜀  
天子化為杜鵑似老烏悲啼清血百花盡有恨不吐歸  
黃壚又不見湘纍平生女嬃罵空遺離騷萬鈞價楚些  
許時招不來亦復穿花繞寒夜願君莫飛入兔園青春  
粲粲花葉繁雄蜂雌蝶鬧如雨於君一脚不可安

贈詵首座

上人鬚髮森如戟，年少曾爲萬人敵。  
父兄膏血染敵戈，晚作梵王門下客。  
西州白氎爛生光，來逐鳳樓山寺涼。  
萬遍蓮花君自足，曹溪一滴定須嘗。

中秋遇雨夜將半素月流天可愛感予賦詩

雲將長空斲絮晴，膚寸而合雨建瓴。  
阿香推車不知倦，雅意望舒無復明。  
地行賤臣未辨訴，斜漢左界俄無聲。  
雖非西園清夜樂，起予縹瓷來酌醺。  
舉觴嬋娟聽我語。

樽下藉汝攻愁城長令屏翳當令節莫遣楚氛蔽明月

謝佛鑑大師寄韞玉鑑

道人力參具正眼古廟香爐心已灰平生厚我習氣在  
索書常逐征鴻來深藏山谷實高蹈下視萬象遺塵埃  
遣奴餉我此長物不比珍簾餘嫌猜摩娑溫潤伴玉德  
荆山抱璞真良材妙香起處侑茶鼎媒孽萬壑生風雷  
忽言與君隔千里對此了了聞談諧

謝王成可惠鼎爐

王郎筆若追風驃歷塊過都愈奇峭胸中好古類古人  
鑄鼎為鑪亦臻妙禹金九牧知神姦周定郊廓垂不刊  
據耳向來為上客折足遙憐空汗顏顏率游談聊貫患  
納却臧孫貽直諫淪亡泗水蓋厚誣得自汾陰亂真贗  
孰如此鼎形瓌奇皤腹雲雷差次之上有蒼虬肉倔強  
隱映么麼微螽斯明牕淨几香氤氲藹如黃雲覆晏溫  
拜嘉詎意獲此寶子孫父已傳仍昆

次九弟中秋韻

楚江微波鳴盞酒脫葉蕭然坐來久仰頭看月落烏紗  
無復纖雲漢津口顧兔之靈態度深搗藥長生傳至今  
風前急管聞三弄泓下蒼龍時一吟逸興俄生縹粉壺  
攜幼近局無勞呼坐中白髮飲輒醉鼻雷發聲聊據梧  
異舍羣雞皆誤唱舍下鳴蛩亦清壯低昂北斗掛柴扉  
不眠尚倚過眉杖

歸舟

旌陽峰頭千仞石溪光卻照楚天碧歸客操舟暝色時

怒雷濺雪多灘磧夜榜時驚鳥鵲喧星光破碎月映門  
訪戴人歸剡谿曲問津客出桃花村香醪獨酌吾靜寄  
萬事不理端復細俗交從來薄於紙小黠大癡聊一戲  
正月二十六日冠順之飲僕以醺醑酒徑醉聞  
橫笛音李仲先順之有蒼頭能作龍吟三弄偶  
不果戲成此詩

髯奴不及緣坡竹柱車守閭各有局苟不上券吾不欲  
僮約卒音幾慟哭劣於郝公常奴爾性不如輩少陵喜

吐茵西曹第忍之封侯骨相多小史蒼頭乃復在琳房  
柯亭橫吹節飽霜炊飯作糜緣底事心寫泉聲風韻長  
冠謙酌我次翁狂如魚聽曲首低昂恨不臨風作三弄  
不減當時桓野王

舟中戲作雜言

昨日觀畫筵李成山水真難忘寒林遠近烟暗澹絕壑  
稠疊雲微茫忽看清溪下野艇驚殘鷗鳥不成行我嘗  
指此語座客安得仙骨來中央此事數日爾忽落圖上

鳴漁榔山重水複灘瀨急雅飛不過吳天長嗟予老矣  
兩鬢蒼放浪自得宜深藏煩於畫筴試檢校恐我割取  
附益歐峰旁

次暉書記韻

平生邁往回萬牛晚著壞袖乘虛舟僧中那得賈長頭  
對語亶亶連不休作夏深藏白蓮裏心如此花映秋水  
夢隨歸雲欲訪之鄰垣華鯨喧枕底

次韻陳無已擬古



說桓佐宣項垂癭銳頭將軍風骨緊病夫面帶丘壑姿  
白薤綠葵窮可忍忠風輝映義骨香苦事何須味方永  
夜歌商頌出金石猿鵲寒柯掛參井

病目宴坐

腦脂遮目乏風味宴坐禪床真得計赤眼歸宗近似之  
面壁少林聊復爾東坡妙語久猶新治日常存如治民  
但學曹叅相齊法清夷王度不無人

連日大雪

春風吹雪塞寒門  
饑鳥暮啼寒雀喧  
此中要是難測地  
材堪令僕無復禪  
引帆上檣中繫輓  
燒車與船復延客  
平生四十二年非  
頓悟前塵頭半白  
願隨谿支水雲鄉  
簑衣負雪時鳴榔  
不知許事付歡伯  
醉著寒灘清夢長

欽定四庫全書

日涉園集卷七

宋 李彭 撰

五言律詩

喜得師質消息

南國柳花合淮壖麥秀初  
數聲傳喜鵲一紙故人書  
君出理煙艇儂還荷雨鋤  
天高風浪惡歸興不應踈

漫興

鴈帶秋聲滿鷗將暝色歸  
打窻紅葉亂裁句碧雲飛好

飲酒儲盡少眠茶夢稀  
眷言方外侶時送北山薇

宿同安寺

山暝客初到雨餘雲尚屯  
長廊響僧唄涼月耿松門  
踐境知心遠背塵惟佛尊  
道人暗不語真覺我言煩

遊藏山寺

招提雖負郭茵閣暗藏幽  
春漲桃花水風回沙際鷗  
含煙朝日麗擇路晚雲愁  
淡墨呻吟內非萱可療憂

久不得潘髯書

八字山頭鴈武昌江上魚略無千里遠不寄一行書度  
鳥愈清曠晴雲時卷舒河陽應好在有底苦相踈

書龍壽寺煮泉亭壁

病馬繫喬木攜筇到上方江花迷枉渚野竹亂鳴榔石  
竈懷桑苧濯尊憶漫郎吾生真寄傲佛地欲深藏

客裏多岑寂尋春興獨賒擎來妙喜葉盡屬法王家不  
見青鞋士來煎黑面茶幽懷在天末落日更鳴鴉

曇珠曇規二禪者歸湖外乞詩二首

淑氣紛花藥  
喧風樂鳥烏  
山僧來訪別  
稚子竟傳呼  
噴玉渥洼種  
行沙滄海珠  
湘天多過雁  
能寄尺書無

獨秀峰前見  
林間憶語離  
游觀如昨夢  
換謝若晨炊  
柳絮飛千尺  
殘陽隱半規  
打包湖外去  
探道就鉗匙

西塔

秋山何秀整  
風磴頗崢嶸  
寺古殘僧病  
門深舊犬迎  
崖蜂將割蜜  
澗鳥自呼名  
毳衲典刑在  
蕭然物外情

病起過鄰寺

慣作招提客應非拖玉身一年強半病十畝未全貧孝  
秀鄉閭盛朝頒符瑞頻不妨幽仄裏高卧姓龐人

封氏野老留飲看白兔是晚微雪

封老朱顏在髯髯已白鬚酌醪招倦客喚婦煮肥鱸玉  
兔君家有銀鬕客舍無醉餘看舞雪未覺客情孤

登無相絕頂舊有東坡題字今不復見

深雲蒙無相斜日照崔嵬慘澹天梯往蒼茫地勢開巾  
裾拂河漢談話雜風雷惆悵銀鈎處歸來首重回

次九弟韻兼懷師川二首

抱瘵便秋晚加餐喜歲豐幽懷烏鳥樂世故馬牛風  
垓戶寒蟲急安巢野老同年来百念冷頓悟衆緣空  
雞回落雁渚菊帶傲霜華稍過郊墟雨猶鳴官地蛙  
層空聽隼擊俯杖看蜂衙妙趣誰能解懷人天一涯

次文虎韻戲暉書記

孤舟泛湛水心法已圓融詩律期三昧庵居役二空  
住山須拙斧閱世任寒蓬慢著尋幽履雪泥殊未通



次九弟韻後篇戲奉世十一弟二首

少成憐季子拔俗似安豐逸氣期公幹鉤深似國風未  
須輕小伎著意要參同聊語詩家病塵窻研滴空  
莫學中郎將休懷陰麗華三餘遊竹素兩部有鳴蛙乃  
肯親龐老多情過押衙吾衰那復此羨爾樂無涯

戲贈

王謝風流在星星映角巾屬文無少盡結社有迂輪頗  
作餐霞侶願充觀國賓徑呼伯雅且入醉鄉春

贈鄒中美

盛漢數鄒陽雲孫復擅場  
荀輿逢鹿苑蠟屐繞羊腸  
囊有壺公藥爐多荀令香  
麻姑在鄉國期子共徜徉

贈暉書記暉有伯時所畫馬甚奇

脫盡膏梁氣祇餘雲壑姿  
囊中支遁馬筆下惠休詩  
木末鳥還語花邊蝶浪窺  
平章賴公等吾病不能奇

聞官軍已臨賊境

聞道官軍至戈鋌壓賊壕  
鼎魚猶未腐穴兔竟何逃  
銳

氣連全楚皇恩貸爾曹  
洗兵無復用歡喜薦春醪

次韻九弟遊雲居

禁足同僧夏秋風倚杖前  
捫蘿懷鳥道著屐到壺天  
霜月懸崖腹參旗落枕邊  
營詩嗟錦盡老語不須傳

夜坐聞櫓

日斜喧急雨雨夜候蟲秋  
宴坐遊三昧因人吟四愁  
疎林月色好別渚櫓聲幽  
卻憶秦淮上寒更渡小舟

自雲居歸欲到瑤田作

稍上參雲漢中藏祇樹園煙橫迷遠嶼鳥度失孤村一  
嶺分晴雨半山纔晏溫回頭聽梵唄真是欲忘言

絕章水

春水靜遊浪晚吹怒生濤歸興催舟楫驚魂寄桔槔留  
髭忽忘故訪戴敢辭勞推挽柁師力令人愧爾曹

哭李少微三首

應劉玉山隕之子尚璵璠未握論交臂俄招去幹魂茂  
陵有遺藁健婦解持門何日生芻蕘人琴恐或存

評闕汝南旦窮嗟校尉途故交非浪哭吾道恐成孤往  
在談文處還能步履無秋風聊倚杖草樹日踈蕪

我客齊安歲君官汾上春安知瀕鬼錄不作定交人  
煬竈中郎滿闕雞開府頻如何令王濟清血染衣巾

次韻東坡五更山吐月

東坡先生喜誦杜少陵四更山吐月殘夜水  
明樓之句其在嶠南列置五章僕蓋誦之不  
離口欲效其髣髴而不可得秋高景寂往來

匡山披衣視夜氣象幽勝乃次其韻作五首

然終不近也

一更山吐月修木瑩澄瀾全勝西園夜金羈帶笑看團  
藥照坐好倚徙冰人寒縹瓷傾竹葉何必辦狼殘

二更山吐月寂寂山家夜衰翁葆鬢濕衡移復露下冷  
冷泉可漱冉冉雲可藉相携塵外人共說無生話

三更山吐月無睡客還起風微一鐸鳴歷歷正談此此  
身如傳舍幽懷湛秋水茲遊共昔遊定非聊爾爾

四更山吐月月是故園明三峽笙簧起紫霄星斗橫林  
猿霜後嘯山鬼夜深行託宿耆闍寺真遊王舍城

五更山吐月夢回人更幽風來虎溪寺江動庾公樓雞

喚楚江曙河殘淮上秋倚梧成短句僅欲不勝謳

案此詩五

章其一四五係律體而二三則古詩但其體以五更聯綴成章勢難割裂故並附此

不宿開先道中口占

穉菊含佳色苔痕上老筇了山已埋玉盧老自鳴鐘但  
飲東溪水休看雙劍峰斜陽空翠合猶聽隔溪春

雪

瑞木辭天漢因風響觸楹光催曉雞誤素失白鷗驚冰  
柱隨門見瑤林逐徑成南州多瘴鬼藉汝勝麋兵

王子張數以詩見過

午夢蠻花濕晚涼衣帶秋愁來倚柱嘯詩到擊盤謳律  
熟無誰敵詞慳不擬酬蘓州語猶在五字為君休

同雲叟遊歐峯

遠墅春辭木空山晚著花幽懷生蠍屐稍上問星槎屢



共普熏飯仍烹圓夢茶期君未衰白爛漫飽煙霞

書懷

未作終焉計懷哉興不踈逢人問息耗閱歲歎乘除老  
境來顏面歸家識此渠攀緣俱斷絕何暇羨嚴徐

遊石鏡溪

石鏡溪邊樹金輪峯上雲貪看魚弄影不覺鳥迷曛山  
態迤迤好泉聲細細分銀鈎懷柱史誰復振斯文

懷秦處度

淮海紫髯叟長吟獨倚風稍將芸辟蠹應罷手書空拄  
策舊寒澗含毫餘老松觀雲每悵望苦念小安豐

留題壁間

遠意在丘壑籃輿同此尋干雲絕壁秀落澗幽泉音卷  
祇盡開士聽法多珍禽煙橫半峯暝信是忘歸心

過蘄州故居

繫馬金沙樹衡茅儼暝途沾襟問隣老携手憶於菟意  
逐前雲遠情隨歸路迂霜風吹曉角夢聽小單于

寄文若

仲氏客淮上蓬窻憶聚星雲從望中密雨逐去邊零赤  
壁念存沒怡亭幾醉醒歸歟勤著腳莫負讀書螢

用韋蘓州神靜師院韻寄微公

雲卧衣裳冷巖幽鐘磬微秋蟲留霧牖夕鳥下煙扉無  
人淪茗椀坐我語斜暉分携復經歲長嗟志願違

將到九江先寄王環中

鹿門真大隱不減遠人村淨供維摩室鄰居祇樹園秦

淮揮別淚楚岸倒芳樽牢落還相見定能顏色溫

新篳濁醪味嚴勁飲數盞大醉醉中作此詩

我生憐麴蘖剛置自中年破屋鳴春溜陰崖響夜泉興  
來猶味著飲罷剩狂顛但病無風韻聊堪栩栩眠

佚老堂為柳仲輝題

小隱寄巖谷堂成笑傲中雖無黃閣相不羨黑頭翁倚  
杖鷗邊雨營詩鴈背風好閑多病處清興畧相同

自寶峯還過長坑澗谷勝絕處

瀲灩水循澗悠悠山放雲關河元未遠境界有誰分幽  
樹花無賴輕鷗聲念羣箇中須著句傳與世間聞

蓺玉軒

短李江南秀虬鬚讓帝孫開懷仍好客愛畫復堪論蓺  
玉風煙外藍溪氣象存他年多結綠會看有乘軒

豫章董瞿老求詩

珍重膠西相風流後葉孫退藏羞射策曠遠頗窺園韻  
絕五峯秀句奇三峽喧荒山多勝踐周禮魯俱存

漫書

歐峯秋色外一上一回高踐華誰云險捫參未覺勞雲  
扉留野客霧牖卧方袍拄頰非吾事何須似馬曹

錢盱眙赴上因乞詩

君自金張侶從予嵇阮遊祇園分客袂星渚繫歸舟楚  
國煙霞晚隋河榆柳秋中州多汲引行矣亦封侯

次瑛上人韻

鼻祖真消息風流出當家觀門親杜順感指悟玄沙顧

我晚聞道參同今未涯懸知飲光笑初不為拈花

題吳少馮聽雨堂

碧澗寒侵屋幽雲夜度牆貪看山入坐怪聽雨鳴廊苦  
乏陰鏗句聊登孺子床君非無汲引寄傲學潛郎

喜得京師書信

簷間噪烏鵲窻下集邕渠喜有大梁使能携小陸書南  
烹飽薇蕨北饌到庭除得雋傳消息更看雙鯉魚

追涼對酒

裊暑晚來歇  
追涼聊解顏  
星移團扇底  
月動縹瓷間  
蟬噪斷仍續  
鳥喧棲復還  
幽人嗜清曠  
只合卧湖山

五言長律

上黃太史魯直詩

扈聖當元祐  
雄名獨擅長  
羣公調玉燭  
延閣近扶桑  
揮灑驚雷雨  
觀瞻列堵牆  
密雲來北苑  
珍菓出明光  
柱下惟青史  
銀臺無露章  
胡為隨逐客  
不作瑞齋房  
岑寂金華省  
蕭條玉筍行  
長庚萬里去  
大雅百夫望  
老覺丹心



壯閑知清晝長珍蔬時入饌荔子喜傳芳世故跼蹐遠  
生涯嘯傲傍甘為劍外客誰念太官羊宣室二天詔遺  
弓萬國傷老臣還召畢陛下過成康澤笏皆忠讜彈冠  
多俊良力辭佳吏部直作老潛郎憶在金華日曾扶八  
座床未能窺絳帳頗識戲羅囊候雁隨陽去奔駒度隙  
忙千秋銅狄泣萬古玉人藏諸阮轡猶在蘄春痛未央  
羣雛極鵝雁衆口歎蛩螢恨之一廛地歸來屢擇鄉親  
交標鬼錄卜築近僧坊宿鳥頻窺牖行蝸每畫梁著渠

上麟閣耻學賦高唐勤我十年夢持公一瓣香聊堪比  
游夏何敢似班揚尚愧管中見應須肘後方他時解顏  
笑何止獲升堂

欽定四庫全書

日涉園集卷八

宋 李彭 撰

七言律詩

觀畫山水

不愛邊鸞愛李成  
胸中成畫自崢嶸  
數行島嶼隨人去  
一段風煙向腕生  
猿啼巫峽殷勤嘯  
雁到衡陽嘹唳鳴  
我與羣山成保社  
直疑俱是舊經行

遠明閣飲

百尺遊絲入座來浮嵐空翠入樽罍談諧自得江山助  
觴詠不勞絲管催滕閣風流今未遠南樓氣味喚仍回  
城鴉欲曙衆客醉木末闌干懸斗魁

城上

城上棲烏尾畢逋寒塘烏影過相呼一天欲放山陰雪  
六幅如觀栗里圖問老自應師粲忍扶衰初喜得封胡  
香醪已熟糟床注喚客無勞滿眼酤

宿萬松兼示慶首座

步屨欣逢釋梵宮，餘霞尚帶日歸紅。  
峯前晚靄晚來積，岫外秋天秋滿空。  
獨鳥深藏歆牖樹，幽花香逐下山風。  
青燈耿耿照無睡，賴有能詩老贊公。

鄒天錫見過

議郎梁嶽坐口語，置散投閒今放回。  
令節由來迫吹帽，幽園尋勝獨登臺。  
共歌昭代得銀甕，何暇著書名玉杯。  
此口惟堪飲醇酎，人間萬事要寒灰。

次駒父遊孺子亭韻

平居懶與慢相親，寄傲行歌似隱淪。  
水退荷花錢殘暑，秋來山色挽幽人。  
從雌鸛鵲窺黃帽，旁母鳬雛映白蘋。  
興罷歸來去高卧，詩成聊復寄雷陳。

余久不飲酒偶飲殊適因和九弟韻

年侵畏病酒尊空，矧復聽歌盛小叢。  
煙際鳥呼雲際雨，花邊蝶舞柳邊風。  
向來懷抱愁眉外，今日懽娛醉眼中。  
何用花奴鳴羯鼓，新詩解穢思無窮。

遊雲居三首

山林投老更疎慵尚有躋攀興不窮絕壑久忘蛇起陸  
寒窻聊食雁來紅人方嵇阮似無愧詩比陰何或未工

永夜不眠茶作祟一燈明暗鳥呼風

雲居稱有雁來紅

故歲新芽約畧黃重來敗葉帶飛霜尋幽少脫塵勞夢  
訪舊頗熏知見香深谷鳴鐘雲暗淡半峰斜照樹微茫  
去天尺五今應是璧月珠星掛上方

羣峯羅立紫崔嵬無復市聲蚊聚雷遠嶠雲屯飛鳥沒  
寒江煙斂健帆開暖眠犢子陽關草香逐蜂鬚陰谷梅

散策捫蘿覓歸路摩挲蒼石更裴回

次韻答董彥速

疎山翠氣連眉嫵雲外飛鴻點點愁只在吳頭并楚尾  
非關張掖至幽州著書繁露想成癖待詔公車安足求  
何日芒屨尋舊約蘭旌蓀楫共優游

過鷺湖懷師川

寶峯嶽寄青未了枕下灘聲走白沙谷口不應無小隱  
桃源真恐有人家寒猿飲水避帆影槁葉隨波上槩牙



苦憶南州徐孺子歸舟天際暮雲遮

春夜奉懷蘓仲豫次陳無已韻贈仲豫

雲外頭陀是去年已看汀草漲晴川夢中未覺關河遠  
枕底忽聞鐘鼓傳但可馬曹聊拄頰看渠鳳閣競加鞭  
蓬窻想得司春甕一夜糟床酒注泉

春日懷秦髯

山雨蕭蕭作快晴郊園物物近清明花如解語迎人笑  
草不知名隨意生晚節漸於春事懶病軀却怕酒壺傾

睡餘若憶舊交友應在日邊聽曉鶯

季敵檢校南村田

風吹穉犂半傳黃準擬中厨雲子香潮水忽生添野水  
山光便可接湖光難求塵外餐霞侶未試囊中辟穀方  
徑遣阿連聊檢校饑雷已復殷枯腸

自豫章歸書齋題壁

鳥烏聲樂客還家僮僕懽迎日未斜小徑潛筠新長筍  
幽齋茂樹晚多花深慚麴蘖留春住尚覺年顏老去賒

出處由來非細事弄泉莫忘飽煙霞

泮宮曝書恭覽御書故事行鄉飲酒禮諸老率  
諸生皆在楊先生病足獨不至賦詩見寄次韻

答之

雲漢昭回泮水邊諸生拜舞鱣堂前老翁七十荷衣綠  
弟子三千桂魄圓樂正足傷何必慮伏生口授尚能傳  
墨池載酒容他日門外侯芭也可憐

寒食日

幽人衣帶病餘寬終日蕭然懶正冠  
柳絮野鶯春向晚榆羹杏粥食猶寒  
倦於杯杓生新興頻有隣儀救老殘  
試把一尊招近友放歌聊復罄交懽

李成德求迺翁挽詩

養疴丘壑玩寒藤領畧雞園最上乘  
射虎已驚生李廣登龍行復見元膺  
九原煙雨悲埋玉一代功名定伐冰  
安得董狐南史筆發揚潛德到雲仍

戲次居仁見寄韻

居仁見督參  
雪竇下禪

長蘆老人半聖號眉毛不惜為談空靜委耽禪如縛律  
懸知選佛勝封公影沉寒水雁無意春入幽園花自紅  
欲向池陽參百問却慙勾賊亂一作破家風

寄如壁上人

平生剛直隱長虹收卷波瀾說一作入苦空翰墨場中無

李廣苾芻園裏有支公未應雪浪侵頭白想見丹砂入  
頰紅驄馬他年焚諫草看君妙手試宗風

次韻寄居仁二弟

隆禮  
敦智

老覺餘生如過鳥何曾留迹寄長空一丘一壑應還我  
三沐三薰盡付公病懶自知玄尚白醉餘貪看碧成紅  
荀家兄弟俱奇絕時聽淮南好國風

次韻寄山伯蕭老二弟

山伯惠瘞  
鶴銘善本

平原翁仲草蒙茸種竹當年語竟空羣從嗟予真漫叟  
象賢期女繼沂公別來江草喚愁碧書到山陰稱意紅  
瘞鶴銀鈎光照坐行書正欲乞楊風

兄雅嗜楊少師忍  
弟輩有之故見於

末句

卜居

有宅一區聊解嘲清風歷歷自鳴瓢買山作隱吾無取  
為黍殺雞何用招魚托么荷障斜日籜隨新竹上層霄  
箇中已了一生事倒屣安能求度遼

寄劉壯輿將赴唐州儀曹

五柳先生同舊科壺觴終日盼庭柯一行作吏事皆廢  
三徑就荒君若何問字有誰堪載酒談經許我或操戈  
平生獨自賞音者聽此殷勤勞者歌

奉贈瑛明發

上人霜鶻氣橫秋法界重重幻筆頭已泛毗盧真覺海  
戲裁佳句比湯休雲開鶴嶺露蘭若波起洞庭霜橘洲  
華髮蕭騷瀕老境多情猿鳥替人愁

駒父次予舊韻見貽復次韻

玉人皮裏有陽秋句入丹青顧虎頭壓倒何勞譏陸陸  
老衰得懶欲休休支牀夢破嚴城角決些風回落雁洲  
遣興竟須桑落酒談閒莫著畔牢愁



用韻戲呈仲誠

蒲萄政復得涼州底事微官章水頭  
早歲已能交北海高懷乃肯顧韓休  
手妙他時掃銀夏曾蟠佳處協滄州  
誰言京兆畫眉嫵後院懸知多莫愁

寄何斯舉

傳詩句句爛生光妙手殷紅入象床  
本自奉常參定脉定從儋耳悟神方  
玉花自合歸天廐黃鵠應須下建章  
見說年來真欲隱轉身一路直須強

寄張聖源

豪氣向來回萬牛筆端衮衮楚江流拾遺已見傳三賦  
平子不應吟四愁柱後許時淹濶步石渠看即副旁求  
老夫病著蒼崖底細和堯民擊壤謳

還家寄吳世長兼簡潘子真

江頭楊柳翹塵姿弄日晴空百尺絲騎省風流還有賦  
吳筠英妙更能詩殺雞為黍相期處問雁呼卿政此時  
下榻深慚徐孺子非關勞者作歌辭

贈九峯長老

已透韶陽向上關  
蔬盂茗椀每開顏  
頭顱無意掃殘雪  
毳衲徒來著壞山  
瘦節直疑青嶂立  
道心常與白鷗閑  
歸來天末一回首  
應在孤峯煙靄間

次韻答寶峯仁書記

袖手脫鞋悲太白  
褰旗縛敵笑光顏  
自知日面與月面  
莫問南山與北山  
獨秀峯前雲不隔  
蓮花洲下水長閒  
還鄉一曲真奇絕  
與子終朝談笑間

寄撫州謝幼槃

別去鷓鴣思日寒書來鶚鵠語林端我懷求仲徑方掃  
君向山陰興已闌細讀清詩如艷雪何時痛飲劇奔湍  
懸知作草非賣菜要自心期禮數寬

賦高明大使神功妙濟真君祠

楊柳江頭星宿踈呼船梢子散林烏煙橫雲捲樹出沒  
天澹波平山有無稚子揔參三洞錄病軀長佩五靈符  
步虛聲裏瞻風馬頗覺神清到藥珠

代虛中作

曉悟無生貝葉經起宗真喜得人英風流定自壓全楚  
文物由來繼兩京謝傳平生處華屋滕公俄忽掩佳城  
哀榮贈典他年在翁仲何知淚滿纓

聽王散人琴

花邊猶舞舊時蝶屋角還鳴他日禽但訝鏡中顏色改  
詎知門外歲華侵一杯相屬步兵酒三疊共聽中散琴  
有慨余懷聊復寫雨餘汀草自青深

南至

鄰雞戒曉暮鐘催老境俱從裏許來但喜書雲占嗣歲  
詎知緹室暗飛灰和風欲上千門柳協氣先傳五嶺梅  
弟勸兄酬真樂事燈前細酌莫停杯

葺茅屋戲成

朔風卷我屋間茅烏鵲含將去作巢執扑鳩工課奴客  
巡簷長嘯望江郊謝公五畝似能保揚子一區聊解嘲  
欲學參謀懷廣廈苦無鳳紫續弦膠

鷄冠

景純機上為裁剪  
淺碧深藏稱意紅  
要與飛鴻同保社  
肯隨凡鳥在樊籠  
鳴堦鼓翼何勞爾  
介羽登場略未工  
赤憤漫多安足數  
尸鄉反笑祝雞翁

七夕用東坡韻

老火微微迹已陳  
稚金稍稍欲親人  
蛛絲曲綴當時態  
舊葉頻澆見在身  
女隸不堪嚴侍立  
天孫誰識靚粧新  
柳州太巧何須乞  
憐汝題詩正角巾

早發開先入城至中道親舊約予復還薄晚復  
自歸宗入郡中

細聽瀟瀟水流澗靜看悠悠山放雲澗底遊魚隨葉下  
巖間獨樹藉雲分殘星已發招隱寺落日願伍耶舍墳  
却背孤村入城市沙邊深愧白鷗羣

過廣濟

不到梅川已十年市橋官柳尚依然追尋耆舊知誰在  
觸撥清愁不欲眠蘭若霜鐘猶喚睡平陽宰木上參天



倦遊客子心無際  
眼盡崗原起暮煙

種僊茅

聞說僊茅勝鍾乳  
移根遠自西山阿  
豈獨客來塵意少  
更覺夜眠幽氣多  
避謗何須求薏苡  
去家不減食蘿蘿  
候門稚子成羣後  
矍鑠仍看馬伏波

王子張以詩見報次其韻

卧看雲生舍北籬  
起來臨鏡慰衰遲  
欲投未落鶴盤嶼  
將去還留鵲遶枝  
天上漢庭勞夢寐  
嶠南殷鑒恐羈縻

藍田丘壑仍孫在勝日勤來賦好詩

七夕懷徐十用去年所賦東坡清涼韻

幽人喜雨靜無塵雨罷幽蟲料理人顧我維摩方卧病  
憶君徐稚是前身鐘鳴祇樹年華隔潮上吳江月色新  
共看牽牛渡河漢月殘露脚濕綸巾

戲次人韻

人言鼓吹來詩思鳴鶴遂聞長阜音細讀一犁新句好  
始知三語用功深自甘散木傲霜節懶作幽雲出岫心

茗盃爐芬清晝永流鶯捎蝶過墻陰

送果上人坐毘率夏

落絮霏霏攪客心鳴鳩歷歷喚春陰未於蓮社添宗炳  
已向蘭亭減道林遠嶠煙橫鐘磬晚禪天目斷薜蘿深  
詩緣酒廢苦無思為子送將聊一吟

舟中次珍書記韻

沙頭作別數峰暝意逐屯雲愁晏陰雨打船篷藏枉渚  
鐘殘客夢憶禪林山重水複歸棹遠魚躍鷺飛寒葦深

何日支郎訪玄度倚松停策伴微吟

用師川題駒甫詩卷後韻

夢中逐客幻中歸荆楚甌閩好賦詩誰謂涪翁呼不起  
細看宅相力能追太冲文價輕皇甫籍也辭源怯退之  
丘壑同盟從已定莫令鬼祟作愁眉

即事

槐火煎茶氣味新東園肯讓兔園春烏摧穠李霑衣袂  
蝶遶天桃傍鬢唇迴策如縈峻儀範好詩轉彈絕風塵

頗勝袁粲飲無偶步屨白楊要惡賓

貽王充道隱士

憶昨涪翁虎溪別雁來一字不曾收勞君為傳三月信  
遣我少寬千斛愁煙艇方遊建業水玉人猶在仲宣樓  
何時掛席西湖去藜杖青鞋鸚鵡洲

潮州木龜有堂舊在天慶觀北極殿之左近為  
道流竊取而去今莫知所在矣

長生要自食山蘚妙語曾聞葛稚川忽見靈龜藏六用

定巢蓮葉閱千年刳腸已笑清江使曳尾聊同修水邊  
懸想偷兒難卜夜守閭黃耳得安眠

宿侍其雲叟書齋

高齋解榻留我宿破夢驚濤翻疾雷水鳥時呼山鳥語  
朝帆纔去暮帆來百年榮落真墮甌一世稱譏同死灰  
珍重秦淮隱君子只今風月且銜杯

竹枕

湘江翠竹斬雲根偃月初無刻削痕尚想繁柯俱笨蓐

曾經綵鳳屢飛翻佳眠時有池塘夢避暑不勞河朔樽  
殷殷晴雷喧白晝兒童走報雨翻盆

過林子幽居

卧聽山城罷擊柝策蹇過君霜滿鬢意間山好天欲曙  
庭下菜肥人愈臞我非當世可領袖君合於今稱楷模  
謝公小草恐未免懷寶要令真不沽

同安即事

搖落霜林秋興新捨舟尋壑自冥塵雲光山色解迎客

松氣竹氛俱著人  
漢上營詩多累句  
孟生題壁欲傷神  
頻伽依舊丁寧語  
應笑華顛映角巾

怡顏堂

心遠由來地自偏  
有琴何必問無弦  
新醪清濁動秋興  
老樹扶疎可晝眠  
失學已從兒輩懶  
哦詩常苦後生傳  
此腰倔强應難折  
尚愧顏公二萬錢

周明府國鎮寄詩有招隱之意次韻以報之

絕壑平生深遯逃  
相期推轂敵英豪  
綠萼白薤堪扶老



黃帽青鞋非養高薰浴懸知慙管葛經綸何敢望崔毛  
新詩如對故人面清夜不眠雞屢號

予以王褒僮約授嗣行叟叟有書抵予并求跋  
奚移文且云要與僮約作伉儷以此詩戲之

髯奴上券歸公許跋奚移文猶見催臧獲要令成伉儷  
文章相與挾風雷目成眉語似真爾足躡心邀安在哉  
大士好奇聊一戲不應禪寂便寒灰

戲何人表

示疾維摩難共語誰堪問疾坐繩床也知世乏長桑手  
盡用枕中鴻寶方馬價不須勞廣漢牛衣何用泣王章  
清涼心地俱安穩特訪名園顧辟疆

仲豫買侍兒作小詩戲之

霜鶚橫空河漢秋聊隨雞鶩稻粱謀却將屬國舊長劔  
換得石城新莫愁要遣短轅無復馭定看遙集解忘憂  
匡山醉客時相訪莫下疎簾作障羞

溪上

門前渾是浣花溪坊裏深疑號碧雞短艇波橫隨暮靄  
遙岑雨歇看朝隰髯奴便了能沽酒稚子添丁解灌畦  
欲賦郊居追沈約只愁誤讀作雌霓

扇上畫雪景戲書

醉餘澹墨寫生綃咫尺真成萬里遙短棹船歸剡溪曲  
披蓑人渡浣花橋暑中松雪俄輝映月裏山河俱動搖  
凜凜寒生立毛髮從今襌襪不須嘲

二月二日大雪

天公長作狡獪戲舍北舍南無限春密密疎疎桃著糝  
娉娉裊裊柳含塵老人已老難復少故衣雖故昔經新  
岸薺未花湯餅滑何勞象白間猩唇

得了翁書

都司曾拂御爐香嚴譴歸來鬢未霜麟閣他年看赫奕  
獸搏今日久淒涼楚氛聞說行將弭漢道真成喜再昌  
莫作湘纍吟澤畔鋒車促召據南床

廬山道中見梅花

江頭細草已搖春幽谷踈梅尚著人未許揚州動詩興  
却嫌戚里妬粧新范郎鄙棗不同傳漢省含香可買隣  
蝶翅蜂鬚莫浪喜元無一物浣香塵

苦雨

陵陂麥熟晚雲黃婦姑當穫相扶將谿山作雨水漂屨  
芝茵對床蝸篆梁宴坐翻疑谷簾下夢回恐在漏天旁  
何時晴嵐來入戶撩我浩歌傾一觴

江梅

江梅疎雨弄晴曛割取江東一信春剩得耐寒驚蛱蝶  
竟來占醉倒綸巾未容作賦重招屈豈敢含毫論過秦  
何日大梅梅子熟從渠高浪白如銀

睡起

鳥鳥聲樂報新晴睡罷南窗午醉醒惡客從譏玄尚白  
斯人相向眼終青渚蒲汀草垂垂發幕燕林鶯續續聽  
日糴太倉真細事安尋佳句遣沉冥

次妙明觀韵

春岸波平汀草深野航蕩槩恣幽尋  
星壇香轉來真侶  
茵閣鐘鳴生道心憶昨霓旌歸紫府  
尚餘鴻寶作黃金  
肩吾戲吐煙霞語縹緲欲仙難陸沈

次韵答仲兄元亮

楊柳江頭人迹稀心隨鐘度遠山遲  
忽傳憶弟看雲句  
想見流觴曲水時人比封胡終有恨  
韻低徐庾敢言詩  
青春欲謝子規叫莫惜歸帆赴後期

用元亮韵寄駒甫

才名綠髮斗牛垂天祿  
讐書何太遲却掃未嘗嗟  
半菽養疴不是傲  
當時鋪張大對明  
光手收卷裁成鄴下詩  
見底冰壺最清澈  
何時照眼會心期

用元亮韵答師川篇末見寄

蚤歲聞君萬人敵  
定交已悔十年遲  
中間會面無虛日  
底事分携用此時  
不隔南雲無過雁  
猶因北阮著新詩  
征車欲作日邊去  
儻赴幽園茗菓期

復用遲字韵呈元亮



去日關河雪打圍  
縫裳密密恐歸遲  
忽看高筍成筠處  
始見殘樽下馬時  
暮雨蕭蕭聊洗恨  
東園物物總宜詩  
莫言心賞隨年薄  
勤赴幽人林下期

東臺

門巷依依稱意苔  
杖藜野色逐人開  
馬駒卓錫今應在  
康樂翻經那復來  
雲物蒼茫山遠近  
波聲宛轉水縈迴  
風流賴有潘懷縣  
一洗從前猿鶴哀

次韻徐師川喜洪駒父歸自臨汀之作

赤壁煙波翻渺漠長沙卑濕重行行一觴一詠勞清夢  
三沐三薰慰別情不作畔牢愁執戟共吟哀郢哭初平  
生來競病幾牢落漫興安能學背城

度章水道中戲用城字韻呈駒甫師川

楚波不動晚山青顧兔西來照我行野鳥鉤輈如有意  
漁歌欸乃亦多情湖邊倒載思山簡機上迴紋念始平  
欲覓澄江如練句乞靈須向謝宣城

次韻答季智伯弟

廢詩不復匠蘇州  
壺簡於人風馬牛  
喜有丘明能撰次  
極知水部愈風流  
句分競病應難敵  
家有封胡可解憂  
共歎宣城游岱早  
剝招去幹不能收

贈蘓仲豫

平生照眼玉壺冰  
解向朝陽續鳳鳴  
黃鵠樓前重會面  
白蓮社裏定交情  
疎才我亦憐文舉  
大雅君應笑正平  
貫酒臨邛聊復爾  
莫令狗監汙高明

贈王環中

拄策前年訪草堂掛帆煙際在西江詩隨鴻雁來春渚  
夢逐蟾蜍入夜窻辭聘知君追孺子屢空嗟我似窮龐  
菟裘欲買為隣竝歲晚相期倒百缸

贈張仲義

春衫試吏楚江濱真以文昌思不羣未暇等陶辭小秩  
何妨慕謝始精文壁間妙句流黃素松下英姿大壑雲  
但恐承明賴公等不容蠻府作參軍

奉贈介然

彈壓諸方化城老聊同懶瓚恣佳眠雲隨雷下雨歸壑  
竹引窻間風動煙畫靜冥搜徒覓句道安高論愧彌天  
叢林良藥今無有絕影須公為著鞭

宿同安用舊韻呈雲叟

蒲柳望秋今復衰遙岑雨罷抹修眉寒林要使入方尺  
妙筆懸知愧畫師不見揚雄草玄手細看束皙補亡詩  
何時共飲建業水更把北山煙雨犁

遊同安寺

郭內那知草色新道人庭宇別藏春  
高榆風度青含英艷杏雨餘紅退  
唇茗盃薰爐清有致禪天金地夏  
無塵裁詩得句如拱壁不費咸陽  
設九賓

遊昭德觀

曉隨歸雁影聯翩來訪仇池小有  
天萬籟虛徐雜鐘磬一源淳樸異  
山川雲霧大壑真遊遠風掃石楠  
佳句傳司命峰前徐孺子幾時風  
雪對床眠

夏牛卿用韻見貽次韻答之夏先  
君子與先平

陽厚善

君合雍容供奉班，彤墀紫仗近天顏。  
悞隨手板落趨走，却望家山思燕閒。  
使君銅狄悲游岱，令尹玉棺今賜環。  
樽前回首二十載，更話幽禪未易攀。

客有和予顏字韻詩者答之

蠻花初捲簾文斑，苦被秋風吹老顏。  
慰眼既親還有舊，起予多病復思閒。  
暮年倚仗心三徑，看子著鞭腰九環。  
小屈尉曹吳會去，莫因橫槩廢躋攀。

送規老住虔之慈雲

禪翁竟補棲禪處  
兔角龜毛杖佛僧  
久厭宗雷同保社  
却凭章貢濁埃塵  
定携天上蒼鷹爪  
去接西江白業賓  
大庾嶺頭梅正好  
同風千里一枝春

郊外書事

郊原野老帶經鋤  
童稚何知競挽鬚  
我亦彌年躬井臼  
兒能終日課樵蕪  
頗思鷗閣仍虬戶  
那似松醪伴酪奴  
志大才疎苦多累  
真須鹿鹿効周謨



和何思舉韻寄元亮兼簡性之

避冷幽窻歌屢屨鴉啼疎柳把南枝長鬚勿送平安報  
滿眼仍看競病詩稚子每嗟簷隙短波臣常梗客行遲  
應貪左轄藍田會落雪官梅動興時

和許秀才見贈許病目良苦

木末鴉啼負郭村無人白晝掩柴門詩來或作破客夢  
語妙直堪排帝閤抱瘵端如叔夜懶幽懷思對阮生論  
何時還子讀書眼解脫無根須返元

和馮仲宣韻

秋風寂寞仲宣樓金狄傷嗟卧一丘  
喜有斯人出淮海  
追還舊觀極風流  
莫將起草明光手去伴諸郎肉食謀  
我欲清江理煙艇尋君楚尾及吳頭

奉酬謝幼槃

窻間遠岫謝玄暉人物煌煌三秀芝  
黃耳來時得佳句  
碧雲合處起幽思  
深閨復見解圍手勝日應多贈婦辭  
念我龐婆最癡絕只能舉案解支頤

次韻奉酬幼槃

結廬不入遺民社，好客初無仲蔚蒿。  
度鳥冥冥與心遠，孤峯峭峭伴名高。  
樽前著我醉千日，鏡裏緣君減二毛。  
安得買隣揮百萬，拍浮左手更持螯。

再次韻呈之忱彥先彥達兼呈幼槃

割據溪山天下豪，長松獨許倚青蒿。  
小巫政自雄河朔，淺器從來鄙奉高。  
爛醉何勞憤田竇，淳風相與繼崔毛。  
不知底事真奇語，且向窻前嚼二螯。

次駒甫涵虛閣韻

夢中占夢偶相逢  
山上有山隨轉蓬  
我自持觴酌玄酒  
君應臨水洗蠻風  
行參鵲鷺我冠客  
豈是江湖把釣翁  
暇日頻來裁錦句  
要看玉手亂殷紅

七言長律

紫霄道中

山行積石路逶迤  
村徑成門逐處移  
一點炊煙生虎穴  
四來暝色到牛衣  
畏人沙鳥飛南隴  
傍母山猿戀北枝

鴈塔崔嵬臨畫嶠墨雲霽對起方池髯秦昔別留奇畫

病可雖亡餘好詩

秦畫松石于歸宗壁間可為賦詩

羊祜不如銅雀妓

蔡邕尚有虎賁兒

世未甚知可而美慶上人者學詩于可


開顏欲效東籬

醉

粟里在歸宗寺旁

真隱慚無谷口姿安得膏腴盈二頃雍雍

喚取共扶犁





欽定四庫全書

集部

日涉園集卷十九

詳校官庶吉士臣陳若霖

侍讀臣孫球覆勘

謄錄監生臣范重祭

欽定四庫全書

日涉園集卷九

宋 李彭 撰

五言絕句

喚渡亭

草風兼沙雨依約渭河邊昔人曾喚渡絕唱頗清縣

戲書山水枕屏四段

遙岑天南端野約垂楊下蕭散策寒藤綠雲復觀化  
澄江真皎鏡短艇戲鳴榔無復機心動不驚鷗鳥行



孤峯上排霄羣木盡生意持竿坐石磯高懷在雲際  
複閣耿蒼烟斜暉掛木末卷帆何處船危檣待明發  
大雪投宿園通以野雪蓋精廬為韻賦五詩并

書塗中所見

寒雪盡垂空玉色粲萬瓦默默行五牙鬱靄望黃野  
昔我遊山陰雜花紛似雪重來雪作團遠樹皓已結  
山翁雪垂素相逢乃傾蓋同看艷雪舞盡此威遲態  
借問佩蒼玉何如煮黃精古來澗谷槩價自重連城

馬疲如客饑稅鞅丈公廬人好雪亦好何啻射洪烏

迎陽閣

扶桑有玉書鬱儀善相保朝暾到頽簷危坐填血腦

予夏中卧病起已見落葉因取淵明詩門庭多

落葉慨然知己秋賦十章遣興

西嶺障斜日澄江來遶門歸鴉千萬點暝色入遠村  
燕坐修白業焚香觀黃庭清霄降真侶弭節或見聆  
境靜輪鞅寡堦空絡緯多蕭然正遐矚脫葉下庭柯

我初卧病時桑麻翳負郭扶杖延秋風山川俱黃落  
寒溫機中素榮歇洞庭葉發興鷗鳥行風烟理舟楫  
平生老驥心伏櫪端有在華月生夜涼南窓歌慷慨  
園中有奇貨雨滿瓜芋田一飽吾已足望山思悠然  
結交何用早士貴心相知苟合殊真味咄咄成乖離  
林廬亦云樂欲語輒復已取琴撫徽絃妙不在宮徵  
沅湘歌九辯梁父吟四愁虛齋無一事坐對楚江秋

六言絕句

太平小寺

行盡斜峯急澗忽看化寺神  
居雲瑣沉沉複閣旁看貝  
葉遺書

昌書記畫梅

花柳春風紛行禪窓晚放橫  
枝號國生憎粉黛晚粧淡  
掃蛾眉

夜坐兼戲環上人

蠹簡聊寬岑寂榴花頗慰榛蕪  
莫問草玄上白須令看

碧成朱

毛髮早驚蒲柳衣裾又變風烟我是一丘一壑君應三要三玄

落木霜猿到耳風高候雁橫空覓句深憑料理解圍俄聽晨鐘

昌書記畫馴猿

巫峽猿啼向曙云何却在樊籠想見珍羞豢養翻思榘葉微風

七言絕句

庭梅

春風日日下丘園  
綠到萱芽蕨破拳  
莫怪庭梅晚來好  
尚堪桃李與爭妍

寄贈擇言兩絕句

憶昨同傾三昧酒  
論文時掇百家衣  
他年準擬蘭亭會  
好畫高人支遁師

逍遙儒墨兩專場  
萬遍蓮花嫁馬郎  
心若死灰詩欲盡

乞儂西國更生香

擇言與參寥相厚善  
故戲作吳語戲之

舍弟彤檢校南庄刈稻中秋日作三絕句見寄

醉後偶次其韻答之

天南雲破玉繩橫上有蟾蜍雲外明共把一杯懷少雁  
新詩深悉未歸情

呼鄰貰酒酒如水以酒攻愁愁有城醉舞不須看短舞  
神清便覺映膚清

珍重江南庾子山詩名晚歲滿江關應須剩讀書千卷

始在班揚伯仲間

答徐十贈詩三絕句

東湖高士有雲孫  
句夢池塘論過秦  
海內故人流落盡  
病夫杯渡不嫌頻

窓中山色撲衣襟  
戶外江聲醒客心  
我在山陰君在剡  
思君行坐短長吟

爐薰細細繞禪房  
竹日暉暉映短牆  
安得買鄰同歲晚  
鉢盂分飯共繩床



答謝邁秀才三絕句

飽聞玉樹堦庭長今見憑虛意欲仙  
遣我池塘夢春草  
阿連風味劇堪憐

短李門前無寧馨書淫詩癡類天成  
多情喜有謝康樂  
步屨同尋鷗鳥盟

平生抱瑟齊門立不比吳宮誇靚粧  
周鼎商盤甚淳古  
君來獨慰九迴腸

答黃直夫二首

紅顏綠髮花映肉別去年顏存語音秉燭相看真夢寐  
細聽存沒欲薰心

筆底瀾翻走百川胷中書傳作豐年自憐疲馬老伏櫪  
絕影如公更着鞭

次韻答九弟首夏郊園即事

疏泉方作薜蘿深月落參橫要共斟徑醉逃禪真祭可  
冥搜得雋近韓岑

阿連句裡欲回春早慎論交思不羣莫願才堪任遺補

來參折臂大馮君

營巢燕子語猶新接葉鶯雛已晚春催曉鳥烏聲更樂  
直疑料理廢詩人

何須痛詆程不識未用親摩史謁居昔時萬事愁眉外  
頓覺幽懷常晏如

再次韻

嬾覓新詩勸春住只愁塵爵每空斟餘酣晚漱沙汀外  
未羨明登天姥岑

陳恬老作中州客少室曉猿聲念羣通籍金闕成底事  
看取九原冥漠君

古木千章夏陰合甕頭別作醉鄉春草玄不是揚雄事  
定自免為投閣人

種葵藝瓠成畦壠奇貨由來果可居漢代封君渾未稱  
故侯風韻擬相如

元亮次韻四絕相撩和荅

枕中鴻寶裹蹄金火候曾經手自斟瓠子河傾那可塞

忍令清餓首陽岑

少陵獨見阮生論我樂同鄉獨樂羣  
兩阮八龍渾可擬操戈披靡獨輸君

久知甕底堪肥遯近覺樽中每着春  
狗竇相呼竟何補獻酬故屬畫眉人

仲子酒狂言語疎文章敢比茂陵居  
未見遠山堪病渴直愁滌器枉相如

清明

汀草汀鷗解喚愁  
舍南舍北度鳴鳩  
深憑竹葉留春住  
未信桃花逐水流

高柳半天渾欲眠  
二毛苦上接籬邊  
興深杯杓懷山簡  
勾夢池塘憶惠連

晚將麴蘖寄吾真  
不道公當恕醉人  
欲學少年花壓帽  
却疑花笑及花嗔

登耶舍塔

五峯羅列斗南垂  
百代堂堂歌紫芝  
一老去為西伯用

四翁應笑北山移

春意三絕

屋角鳥呼春意回  
江花江柳自相催  
廢詩詩思澁如棘  
勾引無勞酒作媒

裁雲為柳雪為花  
惱亂中年春意賒  
庭宇風微教馴鶴  
池塘日暖浴嬌鴉

日日映堦春草香  
春風到處着胡床  
梅梢何許蜂釀蜜  
來採幽園宮樣黃

題溫泉

能使時平四十春  
開元聖主得賢臣  
當時姚宋並燕許  
盡是驪山從駕人

暉上人畫梅乞詩

微風正爾送荷氣  
忽見鞏梅冰霰姿  
元是道人三昧力  
明窓漱墨發南枝

西塔

峯前日出霧初散  
谿上雨來禽亂啼  
欲記曾遊三峽處



詩成賴有董膠西

睡起

林間穉竹猶含籜柳下孫枝屢放綿  
午夢不知清晝永  
嬌鶯啼破晚窓前

奕奕柔桑霜後繁  
縹絲無復罨盆翻  
願同園客罨如甕  
忍使疲民無複禪

烏雀雄猜作伴飛  
機心還復墮危機  
何如絢練堂前燕  
拂面銜泥點客衣

穠麥翻畦雉羽斑  
郊園貫酒有餘歡  
奈何苦雨傾滄海  
坐遣南翁衣帶寬

石闕林端晝夜啼  
羅生芳草綠成蹊  
扶筇攜幼出門巷  
雨過舟橫水滿谿

戲贈行密上人

東風未解北風愠  
臘雪半消春雪深  
欲向僧房覓清晝  
細聽山暝孤猿吟

次李儀中韻送杲上人歸龍安

不作郊原雉應媒心隨山色翠成堆翩然一鉢自歸去  
有意杖藜還復來

訪僧

茗盃薰爐久不來曉猿夜鶴總相猜故將野老扶衰杖  
踏破僧家稱意苔

戲贈嗣譽二首坐

談禪高出瀉仰右著論恥居生肇傍更有新詩堪抵罪  
與君約法定三章

僧中君是玉花驄氣逸渾將入古風欲向松窓翻妙語  
愧無筆力到方融

病中即事

懶慢經時不出門秋風藜杖稍相親念羣屬玉鳴磬岸  
作伴蜻蜓上角巾

病厭鶯兒酒色黃蔬盂終日似僧房馴猿時復攘新果  
夕鳥飛來啄蠹床

初無勾漏為丹砂何必青門始種瓜口腹累人吾豈敢

深勞溪友餉魚蝦

啼鳥引子來衣桁野鷺銜魚墮屋除百念已忘餘習在  
手持叔夜養生書

利口毀譽本無嫌空洞腹中須屬厭何用灞陵嗔尉醉  
未勞漢署歎郎潛

畦間魁芋敵蹲鴟木末深懸大谷梨小摘已堪充米價  
煨嘗聊用補朝饑

絡緯井幹空復啼蕭然脫葉望秋衰最憐庭下婆娑檜

鬱鬱已含梁棟姿

失題

草閣牀扉舊逐涼  
蘋風一曲灑迴塘  
尚餘新月張敞畫  
無復么荷韓壽香

籬邊日出撫孤松  
戶外雲生遮數峯  
避冷隨陽聞過雁  
催昏喚曙聽疎鐘

寒鴉銜枝欲定巢  
近同客食上林梢  
能逃歲德安門戶  
出處懸應不浪交

紛紛眼界禿居士却著雲山壞衲衣箴孔綫蹊無量義  
誰能於此頓知歸

秦郎本是金閨彥撰次曾為仙董狐西狩獲麟雖絕筆  
道山今日要真儒

韓侯數竒亦云極奈此風流英妙何傳聞東觀已著作  
即看西掖與鑾坡

廬山道中

無復春風綠髮前索花共笑過年年只今老境花無賴

媒藥幽人作醉眠

崇桃灼灼眩清晝  
細柳依依迷遠村  
似聽淵明賦歸去  
柴桑幽鳥語黃昏

三年不飲虎溪水  
一笑來嘗鷹爪芽  
岑寂仲堪談易地  
祇餘蒼蘚藉殘花

董仙種杏令虎守  
只今但見蓮花峯  
鍊師欲作小隱計  
餘力猶堪追祖風

憶昨山陰峯上頭  
山腰雲雨半含愁  
蒼崖壁立題名處



光怪時時射斗牛

蕭杌齋中天馬駒追風未試且幽居劇談挽我留三日  
不費一鴟傳異書

不識西湖林處士飽聞陰木叫鉤輅茂陵遺藁今應在  
索價雖高未肯酬

英姿秀骨徐尚書忠義丹青那可圖褒鄂真成毛髮動  
猶將生氣壓曹蜍

北齋兩絕句

芭蕉葉大雨聲催葉底繁  
花菌蠢開欲據胡床呼作  
炙膳夫何用探心來

烟沙茂密小池塘注水枯  
荷馥晚涼何許蜻蜓立荷  
蓋驚飛作伴過東牆

對雪有懷廬山道中

傍窓幽鳥語怱怱雲陣羣  
山雪輒風信有農談四鄰  
久隔籬烟火醉眠中

自和六絕句

麗日暄風下大荒  
百花氣暖漢宮香  
攜幼來尋竹間寺  
游絲寂寂繞迴廊

金屑琵琶刺繡裙  
絃絃軟語怨昭君  
仍年病著屏杯盞  
酒興多於出岫雲

水荇蘆芽相緯經  
倦飛翠碧斲來停  
含毫未下無新句  
安得毫端飛迅霆

蛙鳴廢沼弄妍姿  
破夢起看星斗垂  
度曲安能當鼓吹  
灑灰那復計官私

邊腹從來不貯愁。歸鴻目送頗悠悠。三吳何用憂狼顧。  
一戰行看擒狗偷。

二季蒼顏催我老。年過四十眼猶明。細字未能妨老讀。  
每逢佳處勝專城。

再和

清朝畫省得名郎。嚼麝高談百和香。水鏡欣傳佳吏部。  
更須端委侍巖廊。

仇池仙伯烟霄外。妙出湖州寫墨裙。畫永虛齋風動壁。

枝枝葉葉欲生雲

劉侯白髮續羣經  
原夜憐渠不少停  
齋恨沈王今已矣  
那知為電復為霆

珪璋挺特晁夫子  
家法文章萬代垂  
却袖當年醫國手  
磨鉛起例只營私

且復持觴歌莫愁  
點衣柳絮晚悠悠  
要知境靜自心遠  
不是年衰成語偷

平生愛花被花惱  
况復雜花川上明  
劒外參謀詩滿眼

乞靈何必錦官城

同季敵弟過南岸野寺

楊花糝徑雪繽紛短艇橫江烟草昏小雁俱來覓春事  
情知春過水南村

數日陰雨懷李生

衣裾蘭茝有餘清風骨冰霜照眼明欲共阿戎談絕倒  
亦憎暮雨滴堦聲

丈楸王子知無敵愧我元非王積薪願賦烟茶不堪剪

風流文物不無人

燕領應須遊玉闕歸來綠髮看峨冠  
他時爛醉紅鸚鵡  
更跨追風烏賀蘭

戲刻真牧堂竹間

風微雨細花梢動  
日落鐘鳴雀語多  
未有池塘春草句  
戲成戶外竹枝歌

小憩琵琶亭呈環中養正

南樓岑絕冠湖外  
舉扇每避元規塵  
庾公樓下落帆處

掀簸定為公所嗔

超超邁俗郭有道育孤事嫠如古人莫言壁立貧至骨  
雞黍自是延嘉賓

山南蒨落蘇季子飲作江潮雪陣來想到詩腸應作祟  
挽回妙語如瓊瑰

戲呈子蒼

一杯相屬步兵酒三疊共聽中散琴有慨余心成獨寫  
雨餘汀草晚來深



山郭遇鄭禹功行縣

廣文官冷飯不足行縣符移祗屢催邂逅班荆作吳語  
風姿峭峭絕纖埃

清曉登無相浮屠上有東坡書

窈窕龍蛇穴窟寬淮山楚水繞欄干儋州宰木應搖落  
八法猶參星斗寒

舟中戲作俳體

皎齒青娥倚柁樓楚波微動晚風秋不辭自去迎桃葉

兩槩還須送莫愁

目成可意亦不淺思是羅敷舊姓秦莫道使君自有婦  
願為解佩漢皋人

茯苓

憶昨舍邊松雪明于今偃蓋入青冥何時容我攜長鏡  
翻動龍蛇取茯苓



欽定四庫全書

日涉園集卷十

宋 李彭 撰

七言絕句

老坡自海外歸為書簡寂觀雲卿閣榜今為煞  
風景者毀之

筆底颼風吹海波  
榜懸鬱鬱照巖阿  
十年呵禁煩神物  
奈爾焚琴煮鶴何

戲書

虐雪饕風春事晚輕紅未放入天桃  
即看倚杖花經眼  
便許堆盤黍雪毛

晴簷已復聽提壺濁酒聊堪釋荷鋤  
短短長長愛園柳  
三三兩兩數谿魚

渌井寒泉徹底清不容私地有蛙鳴  
修除何獨充庖易  
要看籜龍將雨行

止酒廢詩春晝長頗知易戒復難忘  
戲于窓下還詩債  
便欲花前喚索郎

次韻文潛立春三絕

臘前漏泄有官梅  
春色懸知裏許回  
日涉園中聊步屨  
黃稭早韭復爭開

后皇司春生意還  
無知草木亦班班  
顧憐綠髮添華髮  
羞插耐寒花上幘

舉酒徵賢且合姻  
盤飧野菜闋嘗新  
陽春有脚今誰是  
始覺前朝貴老身

延福寺

尋盡雲山發興、多稍知蘭若在巖阿不以姬姜棄憔悴  
杖藜聊復一來過

齊安江頭別何氏兄弟舟中得四絕句

疎星牢落散江東、悵望夷猶醉眼中、長年三老相欺得  
故將短棹指西風

八字山頭閱世故、周郎赤壁斷人腸、玉魚金枕皆冥寞  
鐵騎樓船隨渺茫

樂羣野鷺巧相依、旁母鳬雛肯浪飛、怪底相連若耆舊

無人花鳥自忘機

巖巖五老古鬚眉似對幽人歌采薇  
漢事煩公即調護蒲輪飛詔盍來歸

留別小慶

風催萬壑雨歸去雲閉連峯不放晴  
門外從教春水濶杖藜準擬聽江聲

二絕

過盡柳花無復綿幾畦麥浪漲晴川  
幽禽喚起醉鄉夢



疑在故園茅屋邊

生綃他日寫荒寒  
咫尺渾如萬里寬  
我據筍輿烟霧裏  
有人應作畫圖看

對酒二首

頗欲持觴為上頓  
直疑買醪成大偷  
盃中麴蘖可肥遯  
不比終南猿鳥愁

雄猜刻薄王處中  
不飲思欲誅蛾眉  
何如一醉睨萬物  
小黠向來成大癡

夢秦處度持生絹畫山水圖來語予此畫劉隨  
州詩也君為我作詩書其上夢中賦此詩

隨州句法自無敵寫作無聲絕妙詞誰料長城千載下  
秦郎復出用偏師

歲晚四首

天長候雁作行遠沙晚浴鳬相對眠松醪朝醉復暮醉  
江月下弦仍上弦

汪侯胃次潤瀟湘秀潤清時符寶郎謝宇窓間仍發興

敬亭山下屢成章

苦憶中州向子期  
微官鑄盡賦新詩  
清班未許聯天仗  
直指聊看著繡衣

眼看楊柳漲春風  
忽復山明雪映松  
但把一尊扶醉病  
何須三揖送文窮

茅堂清坐有懷元亮

不到青園三月餘  
行間茂密見新蔬  
最憐鼠迹生塵案  
復有潛筠穿我廬

有懷雪堂舊遊

雪堂楊柳三五株堂裏先生萬世無  
伐樹何人成糞土如聞築屋復棲烏

柱史秦郎無檢幅筆端真有大夫辭  
追懷耆舊誰能繼况復賞音黃絹碑

張侯膽蔚氣如虹字字追還西漢風  
歆向俱為泉下士辭林正派絕流通

陳子真成病乘黃園丘一仆殆堪傷  
苦吟幽語多奇澁

未免人譏急就章

柯陂潘子骨已冷文采風流付陸雲不見十年應好在  
酒澆邊腹貯皇墳

珍重何家大小山高文麗賦敵揚班書來慰藉江頭別  
想見園林人外閑

離曲池憇巾口

小泊曲池桑柘陰遠牆岑寂伴高吟孤雲兩角真在夢  
一抹寒林古木深

野僧亦復稻畦衣  
兩兩三三巾口歸  
拂拭涪翁刑部句  
晚風吹泪對斜暉

物色真成行畫圖  
十年對面不供書  
才慳更著李商隱  
無復重譏獺祭魚

林占處士和靖先生之孫也與予厚善今死矣  
作兩絕句弔之

愛君渾似金華客  
謂我猶堪供奉班  
蕭寺愚溪兩冥冥  
一尊聊復對西山

危脆芭蕉何足道姓名今不減西湖茂陵遺藁他年在  
曾有書言封禪無

久不得六弟消息二絕

去日么荷拳未舒水花高蓋已扶疎大醫法窟應尋徧  
有底能忘一紙書

平生大敵劉文叔每發一兵鬚為蒼不得淮南近消息  
蕭然添我鬚毛霜

遊雲居寺三絕

茗椀薰爐久不來  
曉猿夜鶴總相猜  
故將野老扶衰杖  
踏破山家稱意苔

去年重失洪崖約  
今日又寒徐稚盟  
勝日幽期無惡客  
尋僧銀色界中行

燕坐身游水晶城  
夢回心淨玉壺冰  
更聽夜雨簷花落  
却是細泉幽竇傾

代二螯解嘲

臞儒他日倦龜殼  
蛤蜊自可破愁顏  
不似二螯風韻好



那堪把酒對西山

解嘲

平生癡絕百無憂  
黨友相嘲顧虎頭  
癡黠胷中各相半  
要之與我不同流

丘林久矣自耘鋤  
罕識心勞瓜芋區  
不復論文傳幼婦  
安能索筆著潛夫

西隱觀

書籤無復梁蕭統  
像設空餘譚紫霄  
馴鹿將麋眠藥圃

歸雲帶雨度山椒

離豫章進賢道中

春在江村桑柘中  
多情十日雨兼風  
杜鵑北向勸歸去  
我為故人聊復東

招隱亭

裊裊秋風生桂枝  
小山巖壑石逶迤  
王孫歸去歲將晏  
莫學臞儒炊廩庠

鄰雞

鄰雞午唱靜中譁  
挾雨蒼苔傲落花  
已覺星星鬢邊出  
真成一倍惜年華

醉中戲次師言韻兼簡少逸

不覺龐公隱鹿門  
逢場作戲任吾真  
風烟久著雙蓬鬢  
脫帽公應恕醉人

筆下疾雷驚四鄰  
勒兵小試頌聲新  
司空城旦餘波爾  
六籍紛綸井大春

往日風流京兆眉  
却穿習簿敗荷衣  
新詩渾作鶯花語

只欠天街便面歸

愧乏金椎控頤手  
偷兒何苦向人來  
囊空四壁亦云靜  
祇有丹鉛勘玉杯

次韻九弟過炭婦兼懷微公之句

阿連衝曉絕江濱  
驚起江汀鷗鷺羣  
不為營巢祇覓句  
真成拄頰玩幽雲

頭陀雲外見遙岑  
爭似歐峯雲物深  
想見伊蒲欲為供  
波生茗盃憩牆陰

次韻九弟幽園即事

萬事向來元不理  
非關軒傲故相違  
幽園把菊初無恙  
未歎將蕪胡不歸

孰知卜築野人居  
飽聽鄰鐘與粥魚  
便覺悠悠雲入座  
只無瀟瀟水鳴除

次韻正平見贈道予游山北勝處

山南山北似壺天  
雨宿風食近日邊  
噉噉猿啼石門路  
此身渾是謝臨川

佳句全勝顧虎頭千巖萬壑斬新秋歸來把玩無窮意  
始信遙天寄客愁

次韻九弟五絕句

遠韻會須真邁往高懷那用太分明病夫閱世蓋多矣  
說病由來非妄情

草際窓間蟋蟀鳴愁來無路敵方城却憐郢客悲秋賦  
強使微雲滓太清

谷水為簾映暮山珂珠貝玉妥天關傳聞小陸同支遁

遊戲蒼崖鉅壑間

沙鷗日日滿蘋汀  
白髮忘機不復驚  
何處暮帆來浦口  
背人飛帶喚雛聲

橘花漠漠玉花深  
屢起微霜落爪心  
喜有青黃著籬落  
千頭未羨滿寒林

哭尚書墓

過家上冢非無子  
宿草孤墳獨可悲  
賴有立朝莊語在  
不勞諛墓作銘詩

種竹當年語尚新  
藏山萬卷總成塵  
牙籤知落誰家去  
往事淒涼欲損神

遊雲居四首

雞林磨衲度幘溝  
海外風烟在上頭  
箴孔線蹊誰善幻  
千巖萬壑斬新秋

懸崖怒瀑落龍湫  
恰似王師破蔡州  
續蔓沈竿空莫測  
石魚酒舫未應求

壞衲槃跚玉澗翁  
負霜禿鬢頰暎紅  
時時口占東坡語



頓覺曹劉力未工

冉冉山雲低度牆  
涓涓流水響長廊  
不緣抱病關雒冷  
早賦式微緣底忙

寄鄭禹功魏虞卿

杖藜徐步倚柴扉  
園柳青青馬尾垂  
日暖遊絲縈落絮  
黃鸝銜得上高枝

衆草風來俱掩冉  
驚紅駭綠闌年芳  
崇蘭秀發北窓下  
燕坐時聞自在香

苦憶苕溪鄭廣文足驚豪翰獨起羣山南飽看懶行縣  
笑殺無心出岫雲

虞卿再見封萬戶三語掾曹駒伏轅北海會須加慰薦  
橫空一鶚看騰騫

蕭子植寄建茗石銚石脂潘衡墨且求近日詩  
作四絕句

寶犀新胯面巖冷碾出壑源春雪花何用纖纖捧渠椀  
絕勝片片勻流霞

良工刻削類方城煮茗細看秋浪驚未許兒曹輕度量  
豈容奴輩笑彭亨

蒼崖絕壁長瓊腴靈府煩蒸藉掃除老楮羣雞甘下筋  
乖龍左耳避珍蔬

遠竈積烟烟更多絕人妙手不同科蕭郎餉我客卿輩  
遠愧山陰書換鵞

寄臨川諸舊兼悲二謝

晏如雅贍志沈鬱詩語松風萬壑哀皮裏陽秋能刺舉

眼邊青白兔嫌猜

董侯本是古沈冥風味澹然雲水深見說修門和氣滿  
何用涉江歌採菱

何侯嗜學黃鵠舉謝客哦詩丹鳳鳴急雪異時登擬峴  
放歌何日酌宣城

半岳摧峯憐二謝孤墳宿草已蒙茸自歎蔡邕今老矣  
銘言獨不愧林宗

寄何氏兄弟

病語無心復惜秦護持白業五臺賓往時赤壁好風月  
俱助兩郎詩句新

青州從事懶行縣白水真人不造門時作藥山遮眼計  
尋僧煮茗過祇園

次韻山谷寄賀鑄

平生賀監毛髮古風流獻詠付銜杯賴爾雲孫亦不惡  
山陰氣味喚仍回

淮海維揚萬人傑松吟宰上不能杯雖無橫州過秦論

猶有清歌慰九回

客廬山道中寄中上座

谿山軒豁逐時新  
草樹欣欣雨後春  
弄水看山添野興  
可憐魚鳥自相親

著行官柳拂人低  
勾引風光挽客衣  
正是斜川春事起  
翻思戴月荷鋤歸

紫霄獨立冠遙岑  
靜愛雲無出岫心  
見說危梁耿大壑  
欲招惠遠與同尋

顏魯公祠

心正能令筆不欹  
銀鈎猶冠古今奇  
凜然一代英靈氣  
猶似當年罵賊時

鄰寺遣興三絕句

蠻花簾冷春氣分  
午醉醒尋野寺門  
黃落遠林供倚杖  
却疑殘照是朝暉

映堦駁蘚漫層層  
古柏連蜷上老藤  
梵鼓粥魚今落莫  
半歸官焙半殘僧

修源一帶碧灣環上有江西淡竚山便覺心塵雙寂寞  
不愁騎省鬢毛斑

遣興兼寄豫章二弟

國士無雙有山谷斗南獨步憶秦郎鸚鵡洲前多勝日  
古藤陰下夜何長

獨持杯杓酌先酒遺我此物忘百憂乞靈鮑謝共傾倒  
况復隔窓懸玉鉤

龍沙季子在原樂不肯附書黃耳來滕王閣上覓佳句



鐵柱觀頭行幾迴

卽事

勸聽戍鼓擊銅龍  
卧待當軒葉底風  
暝鳥忽穿明月去  
直疑便面寫歸鴻

左界明河夜未央  
輕風灑面作微涼  
藏舟枉渚者誰子  
欸乃歌聲短復長

紛紛著作能上馬  
袞袞紫微俱斲窓  
韓侯遽綰銅章去  
宜坐雙流帶二江

我觀之子秉周禮要使諸儒識漢儀側席求賢天子聖  
未容澤畔弔湘纍

眼看花霧共衣霏已有羣鶯窓上飛心事但隨春事盡  
鐘聲更伴鳥聲微

醉書

醖醖奪目表春餘閒雅雍容亦甚都睥睨園林衆芳歇  
持觴耐久作歡娛

稚子滿林春笋生殘花老境尚多情瀟灑封侯真有自

奇姿未讓惑陽城

湛湛胃中萬頃陂  
翻疑淺器是牛醫  
從來未許愁知處  
顧肯因愁移面皮

送淳軾二上座

密掩柴門斷還往  
道人履迹破蒼苔  
青燈相對語離夜  
况復打窓風雨來

上人定自有佳處  
眉宇翠氣連湖山  
烟邊候雁著行急  
力挽不留相與還

漫興

真牧堂前花草新  
舍南移就一番春  
非關瘠魯欲肥杞  
直恐強齊將弱秦

梅花冷蘂發疎枝  
雲斷天南放日暉  
亂折寒柯有雙鵲  
銜將綴作百家衣

翻經臺

五千餘峯在高臺  
內史翻時臘屐來  
夢斷池塘人不見  
年年春草綠成堆

幽園風雨

妙手春工如畫史  
鶯溪百幅掛城隅  
却將李成驟雨筆  
掩映邊鶯花鳥圖

竹間兩絕句

鳥聲催得青春老  
花氣渾忘白髮新  
誰復能尋三徑友  
信知真是五臺賓

何許晚鐘烟雨餘  
花間蛺蝶舞蘼蘼  
莫將絕壑漱流齒  
戲誦文園封禪書

自西林投宿歸宗

江都著足寫餘酣頗怪朝暉變夕嵐我與諸峯俱是畫  
解隨歸鳥過山南

補遺

魏鍊師四松畫軸

案此下七首據  
玉澗小集補入

四松在澗壑歲晚乃更奇蕭然如黃綺傲岸不可追誰  
將談天口掉舌聊見移由來拂東絹寫此霜雪姿便有  
松上雨催我窓間詩翻思斷青冥採藥堪扶衰當年丹

青手開闢造化隨既有圮下約子行何後期

徐叔明校書篆筆奇古復善丹青為予作漢江  
暮靄扇材極妙力求鄙句作此以贈

曩時徐騎省篆古逼秦相後來得仍孫毫端溟渤壯能  
回頓挫姿丹青生意匠餘酣寫便面萬里烟莽蒼何許  
捕魚郎落日蕩雙槳無勞翦吳淞安用買疊嶂真欲老  
是間塵境孰非妄憐君俱入妙簡遠復清曠定為造物  
嗔覓句聊分謗

夢訪友生

少年結客長安城，妄喜縱酒同章程。  
支離老去一茅屋，枕書卧聞長短更。  
友生相望止百里，寒夜寥閒無微聲。  
夢中乘興輒見戴，剡溪聊爾扁舟行。  
覺來蘧蘧一榻上，不用僮僕爭驪迎。  
吹燈弄筆欲書寄，窓前白月方亭亭。

唐明皇夜遊圖

開元御極垂衣裳，登三咸五凌羲皇。  
白環重譯銀甕出，卜夜遨遊離未央。  
香車闐風秦與號，羅帕覆鞍真乘黃。



赭袍錯落綴北斗步輦優游含纓觴寧王玉笛上霄漢  
御路花光爭月光汝陽羯鼓綃帽穩打徹參旌低建章  
太真霑醉玉歌側力士傳呼聲渺茫翠釵掛冠紅粉粧  
金貂貫酒白面郎君臣玩狎樂莫比清禁喜聞宮漏長  
若令姚宋坐廟堂袖中諫疏神揚揚萬里橋邊行幸處  
後世龜鑑懷苞桑

題駒父家江千秋老圖

江風颭颭江水寒蘆洲雁下生微瀾漁翁夫婦不能語

津吏醉倒船著灘其旁病夫坐箕踞持竿萬事那復顧  
懸知寧斷嬌兒乳不及冥鴻及飛鷺

都城元夜

斜陽盡處蕩輕烟輦路東西入管絃五夜好春隨步暖  
一年明月打頭圓香塵掠粉翻羅帶密炬籠綃鬪玉鈿  
人影漸稀花露冷蹋歌吹度曉雲邊

望西山懷駒父

去歲湖湘賦凜秋聞君江國大刀頭百年會面知幾遇

十事欲言還九休  
照眼遙岑落懷袖  
過眉拄杖立汀洲  
莫言青山淡吾慮  
誰料却能生許愁

